

朝邑縣志

地 153.43
274

274

地 170.45

274

274

274



韓五家先生原本
張元觀瑞石校刊

嶺南先生

嘉慶元年開雕

是政堂藏板

朝邑縣志序

張我華校

余讀郡邑志蓋將極天下之撰矣然益繁而不能詳
晦而不能白亂而不能理焉此安在於志邪夫志者
記也記其風土文獻之事與官乎是郡邑者可以備
極其改革省見其疾苦景行其已行察識其政治使
天下爲士大夫者讀之足以興爲郡邑者讀之足以
勸而已然非以誇靈勝之迹崇獎飾之細也而撰者
之志每不皆若此焉且何以觀也朝邑令陵川王君
涖縣之明年以五泉韓子汝慶所撰朝邑志刻成謂
余宜序諸首予讀五泉子之志異而歎焉曰嗚乎此

朝邑縣志

康序一

一 是政堂藏書

吾五泉子之所以爲志也歟置縣沿革與山川故蹟
官署諸事惟歸諸總志此天下之所通見而不能裁
者斯予之所謂繁而不詳晦而不白亂而不理者矣
今畢以反之矣名宦所以志其官師之行事人物所
以備其豪俊之餘烈其恐猶有所遺而未盡也括之
以雜記開卷之際凡川原改革之異文獻散失之舊
皆縷陳而無憾矣使郡邑之志皆若此其奚有不可
也王君名道字純甫作縣而能先事於此此可以徵
其政也

正德己卯九月十又八日己酉澣西山人康海序

朝邑縣志目錄

一卷 凡四篇

總志第一

風俗第二

物產第三

田賦第四

二卷 凡三篇

名宦第五

人物第六

雜記第七

朝邑縣志

目錄

一 是政堂藏書

朝邑縣志卷一

總志第一

朝邑爲縣起自西魏以據朝坂故名朝邑古爲冀州之地殷周時爲芮國有大荔戎秦厲恭公伐大荔取其王城築高壘以臨晉國更名臨晉後晉奪河西之地乃以屬晉魏獻河西之地于秦乃復入秦漢爲臨晉縣隸左馮翊有河水祠有芮鄉晉亦爲臨晉縣又爲左馮翊治後魏分置南五泉縣隋置長春宮尋復爲朝邑縣唐亦爲朝邑縣有河水祠西海祠武德中析爲河濱縣又爲河西縣以隸河中府大歷中復爲朝邑縣志

朝邑縣志

卷一 總志一

一 是政堂藏書

朝邑縣隸同州迄今因焉而以隸陝西西安府同州于天文爲參之分野東有大慶關又東至于河東爲蒲州蒲州者山西屬州也西有鐵廉山又西有高陽城又西至于干興鋪西爲同州北有長春宮又北有苦泉又北至于金水河北爲邵陽南有漆沮又南有太白池又南有麻子池又南至于渭南爲華陰西南有沙苑城又有九龍池戶凡八十二里成化末歲大饑民多餓死又多亡去乃更爲七十二里正德五年又去其七里今爲六十五里云縣先在西原上有相地者云城居高而左下法不利知縣後其言稍稍驗

乃更移置原下然無城景泰初知縣申閏築焉方三里
有奇東門一西門二北無門南門一城中東偏爲
縣衙縣衙南爲西安行府府南爲儒學文廟在焉儒
學南爲按察分司西爲布政分司布政分司北爲城
隍廟城隍廟北爲陰陽學及醫學倉凡三所一在縣
一在學一在城西原上壇凡三所社稷壇在城西北
山川壇在城南邑厲壇在城北草場二所一在城西
一在山川壇東養濟院在城南教場在城東桑棗園
在教場西漏澤園在山川壇南鋪凡一十八所在城
者一城西者二城東者三城南者三城北者五西北
朝邑縣志

卷一

總志二

二 是政堂藏書

者三社學凡三十所一在城一在柳邨一在新市鎮
一在趙渡鎮一在趙邨一在南陽洪一在永興鎮一
在大慶關一在白冢一在龍池一在龍門邨一在白
邨一在辛城寨一在兩女鎮一在倉頭一在救駕莊
一在許邨一在顧現一在延壽一在王家莊一在八
里莊一在泊子邨一在嚴伯一在步昌一在苦泉鎮
一在霸城一在小伏坡一在白池一在小邨
大慶關在縣東三十里卽古蒲津關今設巡檢司隸
潼關衛又置稅課局關東卽黃河西岸岸去水不甚
高然不溢他處或高四五丈轍溢土人以爲鐵牛鎮

河故不溢鐵牛者唐時鑄鐵爲牛置河兩岸岸各四牛各重數萬斤下爲鐵山尾施鐵軸以繫浮橋旁置鐵人以象繫牛宋嘉祐中河漲橋壞盡曳西岸牛於河元有僧懷丙者乃爲機法取牛河中已得三牛會有言取牛不難者丙怒棄去後人用其法取牛然牛竟不出今西岸止存三牛其一牛乃在河中始河漲時并壞岸元鐵判院仝僉條築焉西北爲大荔戎城卽王城左傳陰飴甥與秦伯盟於王城卽此地後改爲武鄉今廢唐元宗過蒲關詩云鐘鼓嚴更曙山河野望通鳴鑿下蒲坂飛蓋入秦中地險關愈壯天平

鎮尙雄春來津樹合月落成樓空馬色分朝景鷄聲逐曉風所希常道秦非復候繻同漆沮一名洛水自耀州同官縣來至朝邑東南三十里入渭成化中乃崩入河水北有新市鎮宋元置稅監又有饒益寺寺中舊有藏春塢貯古名賢石刻今不存獨殿壁上有宋賈炎諸人題名石金趙抃記曰左馮之東南踰三十里縣曰朝邑由縣之直南林木蒼鬱小徑縈紆約有十里有鎮曰新市鎮有寺曰饒益乃陝右之名藍也路當秦晉要衝枕山河之形勢自唐宋以來名臣賢士經由往返莫不脫駕投榻于

此或題名于壁或留詩于碑不可勝數前後主僧慮歲漫滅悉勒之于石寺遭兵火焚毀殆盡如前人石刻往往埋沒于頽垣遺基之下抆承乏命領鎮事至此恨不及見饒益全盛之時實爲不足每暇日命童僕事鉅築搜抉于荆藜瓦礫之間雖獲名公大臣之行記詩刻例皆斷折訛缺讀之令人悲惋卽其稍完者萃而置之于藏春塢壁冀後之游觀者興葺之不替然周覽環視必思其人焉時阜昌癸丑九月初一日東萊新市監趙抃記

馬坊頭在縣西南十五里唐宋沙苑牧馬及上供牛羊皆置監于其地

朝邑縣志

卷一

總志四

四 是政堂藏書

沙苑城在馬坊頭西廣可數十里卽宇文泰敗高歡唐王重榮敗邠寧朱玫處今泰所種柳不存低凹處乃多白楊

太白池在馬坊頭西南三里池周回可十餘里洞然深黑其上常有雲氣亦能致雨池中有大鯿常食飲馬人以爲神池北爲蓮池麻子池在太白池正北五里池回長可二十里多蓮開花爛然映雲日池東南有安靖寺唐元宗祀汾時駐蹕寺中今殿前有大栢樹懸宋崇寧中所鑄鍾九龍池在縣西南二十五里

池東有聖壽寺寺東北有靈應觀仙人張三丰嘗偈
觀中今爲道會司自九龍池東至于趙渡鎮漆沮經
焉濱水皆種桃樹二三月時兩岸桃花紛然三十里
不絕

長春宮在縣西北原上後周宇文護所築隋文帝置
殿其上以瞰河華洛涓宮下花木四時茂盛如春故
名長春唐高祖起兵大原西定長安休士於此東有
金龍寺僧會司在焉西有元王由義墓南有唐嚴譔
墓墓旁卽譔祠

苦泉在縣西北四十五里以飲羊不羶南有唐同州

朝邑縣志

卷一

總志五
風俗一

五

是政堂藏書

刺史姜師度通靈陂陂故漑田百餘頃今廢又南有
元戈平章甘社寨

金水河在苦泉東北五里自郃陽縣來舊嘗引水灌
田今廢北爲夏陽卽韓信木罌渡處

風俗第二

語曰至治之極國無殊俗今天子神靈海內一統烏
有所謂異俗者哉然閭閻趨向節序往來嬉戲之間
則有與他處異者秦民皆力農朝邑頗事賈婚姻論
財仕者尙廉有氣前輩盡然今少衰焉元日樹紙竿
接天神以麻縛木炭置門上云吉利二日壻住拜婦

家五日以故綵紙爲婦人戊夜乃出婦人送窮二十三日置煎餅屋上補天是日仍不得食米清明婦女盡出遊觀三日乃已不得舉女工云卽舉之且盲四月四日男女戴皂角葉已頭痛五月五日六月六日七月七日九月九日迎女之已嫁者臘月五日食五色煮豆豆者毒也食之已五毒

物產第三

朝邑無他奇產產獨服食他處俱有者不載載其美者多者果則瓜桃梨棗菜則韭蒜藥則麻黃甘遂香附枸杞魚則魴鯉畜則羊服則木綿絲絲出南陽洪朝邑縣志

卷一

風俗二物產一

六

是政堂藏書

者斷則易續引之則長

田賦第四

朝邑土田凡二萬四千一百四十九頃三十四畝戶今一萬二千九十八戶軍二千三百八十七戶匠三百六戶雜役一百七十八戶餘俱民戶焉口凡六萬二千六百二十七口秋夏稅凡二萬七千五百石有奇草七千三百六十束有奇木綿三千八十三斤絲綿六斤有奇布九千七百三十三疋絹一百八十二疋此其以田賦者其以丁賦者又有鹽鈔十有七萬六千八百四十貫貫准銀三犛黃丹二千斤斤准銀

七分綿羯羊二十隻隻准銀六錢細辛一百三十斤
斤准銀六分凡得銀五百一十六兩有奇又有石青
大材木炸塊木柴黃熟銅山羊皮諸雜歲調多寡不
同而力差不與焉宏治以前丁賦力差供歲足則止
不派故能以三十六里更用而迭休之以後乃通取
焉所以然者以用聽差者聽差者差已足無差而聽
差也聽差者官盡收銀而貯之庫上戶丁九錢至七
錢中戶丁六錢至四錢下戶丁三錢至一錢畸零者
丁一錢于是無空民矣

張我華校



朝邑縣志卷二

名宦第五

朝邑幅員不及二百里東有鹹灘西有鹽池凹南有沙苑皆不可耕可耕者纔十分之二三耳而又界河渭漆沮三水者歲溢而善崩溢轍沒禾稼崩乃數十年不得田以故朝邑民獨貧少生業夫其和來安養獨在縣官耳縣官治績顯者洪武中則有縣丞卞禮宏建百規開先來者成化中則有知縣李英然英善修舉喜用民當其時聲名籍甚去之日民莫能思也宏治中則有知縣蘇槃廉謹不擾庶幾良吏近時則朝邑縣志

卷二 名宦一

八 是政堂藏書

有知縣衛傑非惡自持取與峻潔他無錄焉若夫元氏以往其或治績莫考而名氏猶存苟非聞人碩士必其遺愛不忘用並書之以垂不朽而教諭翟方附焉

晉歐陽建字堅石渤海人爲朝邑尹

唐劉幽求冀州武強人爲朝邑尉

季邠 人爲朝邑尉

畢縣令名次莫考

元成好德顏英俱朝邑知縣

大明卞禮

人洪武中爲朝邑縣丞

李英河南祥符縣人成化中爲朝邑知縣陞去
蘇槃河南南陽縣人宏治中爲朝邑知縣罷去
衛傑山西夏縣人正德五年爲朝邑知縣致仕去
翟方山西榆次縣人成化中任儒學教諭善教朝邑
科目成化中獨盛甲午科舉六人庚子科舉五人
人物第六

賢人長者懿德美行湮沒多矣豈不惜哉蓋宏治中
沮水齧趙氏墓墓崩有石曰皇慶二年旌表孝子趙
良

漢籍少公嘗脫郭解于厄吏人踪迹至少公少公乃
朝邑縣志

卷二 人物一

九 是政堂藏書

自殺以滅口

唐嚴譔則天時爲詳審使活死囚八百餘人罷疑獄
百人又原不實者千餘姓譔善風角繼李淳風爲太
史令占熒惑入輿鬼及諸張敗及諸陵墓事俱驗譔
子向爲鳳翔尹有政聲

申屠思恭呂昂郭觚張元亮唐書云事親居喪著異
行者

元趙良孝子
王亨爲縣幕官亨孫由義至禮部侍郎歐陽元王氏
世德序曰亨爲縣幕官持守端楷每與時尚異同遂

棄去不仕由義爲徽政院都事能抑內侍節浮費爲御史累有獻普從幸上京抗章論衛士縱牧踐民田行營無敢犯者又與時相爭江西行省戰功至相震怒不爲動

大明高翔程濟楊景學馬仲昌洪武中俱以明經徵翔有文學節行爲監察御史高皇帝甚眷注翔翔所論奏無不關國家機事當上心者革除閒文皇帝素聞翔名翔將大用之會翔服喪服入見語又忤旨乃殺翔族其家沒入其產諸給高氏產者皆倍其稅曰以世世怒罵御史也御史親戚皆配爲軍濟有法術

朝邑縣志

卷二

人物二

十

是政堂藏書

爲四川岳池縣學教諭岳池去朝邑數千里濟寢食俱在朝邑而日治岳池學事不廢革除閒上書言某月某日西北方兵起朝廷以爲非所宜言繫至京召入將殺之濟叩頭曰陛下幸囚臣期而無兵臣死未晚也遂繫濟詔獄已而兵果起乃赦出濟更以爲軍師護諸將北行與靖難軍先鋒戰于徐州大捷會曹國公師退文皇帝至江上濟逃去不知所終始徐州捷時諸將乃樹碑載戰伐次第及統軍者姓名濟一日夜往祭碑人莫測其故後文皇帝過徐州望見碑顧左右曰碑者何也或以狀對上大怒趣左右椎碑

一再擊遽曰止止爲我錄碑來乃按碑族誅諸將無得脫者濟姓名正用擊處得免濟曩者之祭蓋禳之也楊景學縣丞馬仲昌大理寺左寺丞

李濟樊冕蕭斌劉讓上志韓家君名馬驥王沓房瑄韓邦奇韓邦靖牛斗王朝塗俱登進士李濟官至左副都御史一統志云濟才敏學優歷官守法樊冕官至河南參政先爲都給事中吏部擬冕戶部侍郎英廟方嚮冕曰樊冕豈戶部邪可吏部侍郎無何英廟晏駕乃不果用蕭斌至通政管易州柴厰保定府志稱其廉謹自守劉讓至知府讓有氣先爲戶部主事

朝邑縣志

卷二 人物三

十一 是政堂藏書

監太倉與內臣爭席相惡乃謫東萊通判後爲永平府同知永平府志稱其剛斷韓家君名至福建按察司副使上志馬驥俱知縣王沓至郎中側儻任豪數有論奏房瑄至按察使瑄先爲郎中上疏論時政時人稱焉今家任邱韓邦奇至僉事韓邦靖至員外郎皆副使韓家君名子今俱以罪譴爲民牛斗今養親王朝塗今依親韓邦靖曰宏治中教諭西蜀李君志朝邑其稱家君曰登進士仕至福建按察司副使居官有爲執法平恕閩人思之成化中爲刑部郎中朝廷有大獄擇公正官鞫之僉推公初往正定再往大

同曲直允台上心宏治初元上疏論時政多所允俞云

楊仲貞吳埴唐夔倫楊恭王翼趙整歸儒李睿王福馬駿王剛楊茂王孜王恪安永周道張玘王禮翟溫王質楊禮趙衡靳能陳善雷嚴周易韓倫楊珪趙鼐劉偉靳時熙安才孟熊郭鼐張磬劉永張珂梁文盛雷爵李貞蕭鵬周瑄李夔仇昉于章雷霓楊煥楊友党爵東陽韓邦彥程範王朝雍雷子質孟埴樊得仁俱鄉試舉人楊仲貞楊禮張磬仇昉俱至教授磬淳潔業尚書進士甚精吳埴府照磨唐夔倫王翼歸儒

朝邑縣志

卷二 人物四

三 是政堂藏書

楊茂王禮靳能韓倫安才郭鼐李夔党爵俱知縣倫剛介有行鼐治曹縣曹縣志稱其吏人畏服楊恭至陝西左布政使宣皇帝時恭謁選吏部言事稱旨即日召見上以恭言事有才而見又容貌偉甚乃勅吏部與恭左布政使部尚書言左布政不缺員缺獨陝西恭不得往上曰朱買臣獨不爲會稽邪恭奚不可陝西遂授恭恭頓首固辭上曰吾知若辭布政矣顧陝西鄉里撓而法耳乃令恭得便宜治事而賜免死券十道又以子剛爲錦衣指揮始恭行時入謝知縣知縣不爲禮旣得選乃令從者不得言布政衣故破

衣納憑券破囊中置驢上騎往見知縣知縣不知恭
已得布政又爲陝西勞之曰楊進士甚勞苦所得何
官邪恭曰比知縣差大耳知縣素易恭聞恭言遂怒
曰若言官大豈爲布政邪縱布政將如朝邑知縣何
恭笑曰安知非布政邪且正能治朝邑耳乃徐徐出
其囊中憑券乃陝西布政也一縣人盡驚知縣卒得
罪去趙整至監察御史周道至僉事道中式時驛歸
將渡渭一婦人從後呼之婦人曰君騎卒妾子也妾
寡居待此子以生念其當渡渭故追視之耳道惻然
舍騎步歸後爲御史征雲南夷總兵官饋貨寶幾千

朝邑縣志

卷二 人物五

三 是政堂藏書

金道却之又爲山西僉事有惠政卒于官喪出民遮
道哭奠三日不得行李睿不仕王孜翟溫俱衛經歷
王恪都司斷事王質趙稟雷嚴楊友俱教諭趙衡陳
善劉永俱訓導楊珪至太僕寺丞珪喜修廉隅飾儀
度尙退不干教授禮子劉偉至知府以厚德稱先爲
文水文水刁悍劇縣偉不嚴而治梁文盛蕭鵬至知
州雷爵張珣至府同知李貞周瑄雷霓于章俱至通
判爵珣俱純篤廉謹至老不踰珣先爲通判時吏部
舉天下廉有司二十人珣與焉時人榮之楊煥韓邦
彥今任知縣邦彥副使韓家君名子王朝雍雷子質

程範樊得仁孟塤今舉進士朝雍郎中香子範縣丞
珏子餘未仕卒靳時熙知縣能子

喬誠許清黃秀孟濟張亨張璟秦禮席慶仇約石秀
李珍薛義李蔡馬恭張翼党聰李敬李時楊濬楊寶
孟震王臣趙璞馬賢唐通馬充韓威上忠楊銘周瓚
王瑾劉紹翟祥暢廣程珏吳珮張輔李聰王純翟景
陽王訥馬因呂聰王銳孟奎尙貴馬輅俱歲貢喬誠
至山西參政一統志云誠處心忠信措事寬平許清
至知州黃秀孟濟秦禮石秀張翼楊濬王瑾暢廣俱
知縣張亨王臣俱判官張璟楊銘李珍薛義趙璞唐
賢府照磨馬因州吏目餘不仕卒

蔚能吏員至光祿寺卿禮部右侍郎能有廉操歷官
不營產業卒賜諭祭

尉遲閏王式賈訥仇名善俱洪武中以人材徵閏至
通判王式賈訥至知府仇名善至知縣

周彧洪武中上書求仕進上召與語大悅乃授觀察
使彧舉劾無所避于是百僚皆畏觀察使俄遷吏科
給事中同東宮治秦邸獄歸乃陞通政使以讒下獄

籍其家得衣一襲俸米數升上召問曰通政官尊祿厚何大貧邪或叩頭曰臣以草茅待罪九卿自知無功能不稱任使所得俸不敢盡受皆歸之官耳已而通政司乃上或所歸俸金上知其枉赦之因賜錦衣二襲寶鈔若干或沒上嘆曰周或難得朕用之不盡其才也

劉偉田隆王朝璽蘇民望皆親喪廬墓三年偉仕監察御史璽望今納銀爲監生

嗚呼節義人之大閑也豈非人之自立于世者歟吾觀世之達人通士號稱知道翩翩然以自異于世夫

朝邑縣志

卷二 人物七

五 是政堂藏書

其日日稱說仁義不離口其自負豈在婦人女子下哉然竊觀其所以不逮遠矣吾邑有劉烈女者龍門邨人女也成化中父母許婚楊氏楊氏子死女乃素服涕泣不食將臨其夫喪家人咸非笑之有舉人偉者女族兄也女往質焉偉曰汝所爲誠是柰世俗何女曰吾所爲求是而已矣奚以世俗爲然家人竟止女不得往臨其夫喪女乃自縊死烏呼斯人者蓋所謂建諸天地而不悖質諸鬼神而無疑百世以俟聖人而不惑者也嗚呼烈矣節婦則蔚太淑人薛氏韓太宜人張氏馬宅妻王氏張三妻師氏王亨妻靳氏

韓廸妻楊氏楊質妻張氏韓繼宗妻雷氏

雜記第七

漢莊熊羆言臨晉民願穿洛以溉重泉以東萬餘頃使鹵地誠得水可令晦收十石于是發卒萬餘人穿渠引洛水至商顏下

唐太宗貞觀四年駕幸鹽池經朝邑賜朝邑民今年田租

國朝正德庚午朝邑民周雄言朝邑縣東北故有鹹灘萬餘晦近年河水淤漫頗堪耕種當同常田徵稅巡按御史王廷相議曰朝邑鹹田雖暫堪耕種難保將來若便同常田徵稅將貽禍無窮乃不徵今鹹田果不可耕如御史議云

正德戊寅朝邑民張某言朝邑太陽諸里民田圯于河幾萬餘晦乞議處田稅巡撫都御史鄭公移縣視狀知縣陵川王君請曰誠如民某言所圯田稅宜從輕額都御史可其議于是田以糧拆布者凡若干晦關中南有肴函之固北有蕭榆之塞西阻棧道東據黃河古稱四塞之地故曰秦得百二焉然河自夏陽而北兩岸山嶺峻複不可以師夏陽而南經朝邑至潼關凡百里率平曠易渡故漢祖往來關中嘗由臨

晉而七國謀反亦欲由臨晉入兵是朝邑者關中之
障道也故一方不戒三險俱失矣

正德己卯知縣陵川王君言朝邑爲山陝要衝與蒲
華等然朝邑獨無驛所又近時河南應驛者率避潼
關而之朝邑遂爲三省之滙朝邑民不任供送于是
巡撫都御史鄭公下其事乃以郃陽馬驛二十夫百
人澄城馬驛十有五夫八十人協濟朝邑

張我華校

朝邑縣志後序

右朝邑志七篇工部員外五泉韓汝慶之所編也紀錄質實而文彩煥炳可誦其傳人物說高翔程濟及烈女劉氏事婉乎若覩其人真足以廉頑而立懦不可謂無筆力也而雜記一篇又多政事利害所關以示後之爲朝邑者何惑焉其餘五篇事雖不異他志而紀例亦自殊稱爲簡確之編信矣然則陵川王君純甫知是邑而刻此編人雖曰不良於政則吾不信也

正德己卯秋七月二十二日賜進士及第翰林院修

朝邑縣志

後序

一 是政堂藏書

撰儒林郎同修國史經筵講官高陵呂柟書

張我華校

朝邑縣志跋

道始至蒲臨河而西望朝邑卽壯其山河之美比入境左唐關右隋宮盡覽其古跡之勝比入郭閭里輝聯後先掩映則又嘆其人物之秀且盛而果非他邑比也顧其邑志繁蕪汙穢不足以彰往而詔來道乃請諸五泉韓先生作此新志焉其視舊志雖省三之二然而爬羅剔抉昭昭乎可激勸于人者不啻加千百也旣而又得對山康先生涇野呂先生序諸前後則斯志也滋可傳諸木以爲斯邑實籍矣若夫企先賢而思齊覩名宦而思政慨風俗而思易移觀利病而思與革則又後之有志者事也于道何有哉

朝邑縣志

跋

一 是政堂藏書

正德己卯九月吉旦知朝邑縣事山西陵川王道跋

張我華校

校刊朝邑縣志書後

明正德十四年五泉先生韓汝慶邦靖述朝邑志二卷七篇十七頁凡六千七百五十言前後有康對山呂涇野二先生序又自序一篇知縣陵川王公道跋語一篇至于今二百七十五年數經翻刻板本多譌我華既為之注詮承證亥校而梓之因念先生斯志簡核爾雅文成篇段一經箋注支節岷絡皆為注文隔斷殊不見其妙才快筆往讀三國志每當擊節稱賞輒為裴氏注文所隔使永祚妙文散落不能快讀一過以為恨事懲此取先生

朝邑縣志

書後

是政堂藏書

縣志原本重加雋校其閒疑誤詳見注本若夫板刻之謬如總志篇以輟溢為輒溢以王重營為王重榮朱孜為朱玟今歡為今泰名宦篇以輟沒為輒沒人物篇唐嚴謨誤作嚴謨唐張元亮誤作張元亨雜記篇莊熊羆誤作莊熊罷之類即事刊正付諸剗劂嗟乎先生人品文章久已見重海內我華何敢瞽贊一辭謹述校刊始末附著于後以存邑中文獻云爾嘉慶元年歲次丙辰冬十有一月壬寅朔長春外史張我華元觀甫書於瑞石山房



朝邑縣志注

地 170.155
274.1
江
郭

170.155
274.



五泉山人著
長春外史注

朔方道志

嘉慶元年羊開雕

是政堂藏板

朝邑縣志序

余讀郡邑志蓋將極天下之撰矣然益繁而不能詳晦而不能白亂而不能理焉此安在於志邪夫志者記也記其風土文獻之事與官乎是郡邑者可以備極其改革省見其疾苦景行其已行察識其政治使天下爲士大夫者讀之足以興爲郡邑者讀之足以勸而已然非以誇靈勝之迹崇獎飾之細也而撰者之志每不皆若此焉且何以觀也朝邑令陵川王君涖縣之明年以五泉韓子汝慶所撰朝邑志刻成謂余宜序諸首予讀五泉子之志異而歎焉曰嗚乎此吾五泉子之所以爲志

朝邑縣志注

康序一

長春外史

也歟置縣沿革與山川故蹟官署諸事惟歸諸總志此天下之所通見而不能裁者斯予之所謂繁而不詳晦而不自亂而不理者矣今畢以反之矣名宦所以志其官師之行事人物所以備其豪俊之餘烈其恐猶有所遺而未盡也括之以雜記開卷之際凡川原改革之異文獻散失之舊皆縷陳而無憾矣使郡邑之志皆若此其奚有不可也王君名道字純甫作縣而能先事於此此可以徵其政也正德己卯九月十又八日己酉濟西山人康海序

海宇德涵號對山武功人也宏治十五年進士第一

人於書覽而不誦蓋悉其意而遺其辭嘗曰經籍古人之魄也有魂焉吾得其魂焉已矣譬之酒善飲者漉其醇不善飲者啜其醜其下則貪糟醉焉耳又曰上士恒逸下士恒勞夏螢而冬雪佔俾焉不足而繼之夜不亦勞乎誠虛吾襟尋夫博之人而友之則博不在彼而在此矣吾何螢雪爲哉故其在辟雍也什九在外而日尋朋友此海之學也而挾冊者笑之既而同試笑者方咨議構思海已投卷而逝矣在史館凡三年凡諸箸作必宗經子史以宋人言爲俗唐爲巧秦漢爲伯仲而有駁焉故同進者忌劉瑾敗忌者

謂海交瑾遂罷其官而禁錮焉海愛人之心長而自好短嘗援人於死而獲生者數人非望其報也獲生者或顧謗其爲交瑾忌者徵焉因陷於網羅而不可解矣時王泮九思亦以瑾黨坐廢海每與相聚泮東郭杜閒挾聲伎酣飲製樂造曲自比俳優以寄其拂鬱之氣年六十四卒所箸有武功志張氏族譜對山文集汧東樂府行世

張我華曰海嘗論文謂古人言以見志故其性情其狀貌求而可得焉此孔子所以於師襄得文王也故昔人陶則陶杜則杜韓則韓柳則柳咸自成家今或

不能自立傍人門戶效顰而學步志意性情略無見焉無乃類諸譯人也邪君子不鳳鳴而鸚鵡言陋矣哉海明史附李夢陽傳後僅一百二十字故略取家牒及續藏書而傳次焉海墓在武功縣近郊康熙初被發形已消化而雙眸炯炯如生世言海爲拚李夢陽曾一入劉瑾之門後瑾敗海遂禁錮終身故死而不瞑李夢陽卒葬禹州大陽山順治初先已被發盧龍韓子新收葬之二公皆有身後之禍異哉

朝邑縣志序

朝邑舊有志然不載高御史及劉烈女事二人者代不數人顧可弗錄邪非也奇異如程濟善終如周或寵任如楊恭叵略而不書沮水入涓蓋數千歲近時迺徑入河川源改革此其大者而弗箸後之人何考焉他可知矣縣尹陵川王君曰是志且不傳然烏可以但已邪迺以五泉韓子韓子於是乎編焉夫昔人之爲朝邑志也豈不自以爲善哉然後之人乃有議而更之者豈非一人之見有時而窮邪今之志如斯也夫今人之見猶昔人也夫其繁簡取與之間其可議者吾不知其有幾也

朝邑縣志注

韓序一

四

長春外史

後之君子各以其所見刪補而更正之猶今日焉斯爲全志矣豈不善歟今志凡七篇正德己卯二月六日五泉韓邦靖書

邦靖字汝慶別號五泉子朝邑洛苑鄉人副使紹宗第三子也母曰閻恭人宏治元年閏正月初一日子時恭人夢五色雲中奏異樂玉女十餘人持蓋擁一美童子入寢室覺而生邦靖三歲能哦詩百餘首四歲讀孝經未終篇卽能自誦小學了大義五歲讀文王至德篇掩卷若有思者父問之對曰卽如是武王非矣父大奇之十四歲舉於鄉正德三年登呂柟榜

進士除工部虞衡司主事陞都水司員外郎九年以諫罷歸十六年世宗立詔起用嘉靖元年擢山西參議分守大同二年正月自劾歸三月寢疾病四月十日衣冠如平生呼兄邦奇曰吾不起矣十九日必大雷雨卽爲我戒衣衾旣曰先君之歸在是月二十一日吾強待之兄好作忌辰也十九日味爽晦冥大雨震電如在寢室門牖皆震動而邦靖不語矣邦奇爲之正衣冠乃搖首問待二十一日乎乃首之明日復問歸期翌日乎不應邦奇哭曰吾弟力不能支矣乃又首之遂卒卒之一月武功康對山海來哭曰往年

泰山崩吾謂三秦豪傑必有當之者旣而何仲默卒吾謂仲默陝西官山之崩在是矣今乃知非矣乃應吾五泉子也初邦靖之在虞衡也部檄監收十庫時宦勢熾舊典廢部官往下吏視之邦靖至坐前席羣宦不平給曰部尙書至因起徹坐詰之荅曰部官故事無前席者然止一飯無豫庫事也邦靖曰然則我當去耳曰當署案曰旣無豫庫事安得復署案羣宦計窮卒如舊禮旣而又檄監收黑窯廠廠宦者主之弊尤甚邦靖自起視稱羣宦百計誘之不可移乃適邦靖次當抽分去矣抽分者司利之職也抽分者率

避嫌重取於商進羨餘以自白邦靖乃下令非巨材若竹木成器者免徵正德七年南北直隸山東河南盜起朝廷命將征剝工部官例用一人前除當前除者數輩懼不敢往言之部尚書有泣下者次不當邦靖部尚書知邦靖勇敢可使數日邦靖邦靖毅然請行比歸遷都水司員外郎乾清宮灾詔求直言邦靖上疏曰夫民者樂安而思治惡危而厭亂向背之際甚可畏也臣竊見陛下自卽位以來朝政不修經筵罔御盤遊無節狎近羣儉摧折骨鯁之臣閉塞諫爭之路百度乖違庶事叢墜府庫空竭閭閻流散盜賊

灾異薦至迭興危亂之形已成社稷之憂將大頃者乾清宮灾陛下下詔求言在位羣臣疏論剴切時政闕失指陳略盡天下之人皆以爲天心仁愛啓佑聖衷必將延覽聽納革旣往之愆圖維新之化澤閭生民永康社稷在此一舉不意陛下徒事虛文不修實政凡諸過舉仍遵往轍臣工章疏罔有施行而部官黃體行乃又以言罷去天下人心莫不囂然沮喪以爲陛下遭此大異因循恬安尙復如此是陛下無悔悟之期天下無治安之日渙散支離不可收結書曰民可近不可下下尙不可而況使之離哉夫親離者

家散民離者國搖故漢儒有土崩之言先哲有搏沙之喻臣每念及此實懷隱憂伏望陛下以社稷爲念將各官章疏采擇施行將前後言事得罪之人并黃體行取回錄用於以收既散之人心迺將來之福澤天下國家不勝慶幸疏入武宗震怒下錦衣衛獄給事中李鐸率衆論救乃得奪官爲民家居八年御史師存智范輅給事中徐之鸞皆奏起用不果嘉靖改元起山西布政司左參議分守大同於是感激單車就道至則革奸平獄權豪斂迹時朝廷方修定策功封爵太濫邦靖以高皇帝定萬世之策兄終弟及今

朝邑縣志注

韓序四

七

長春外史

上乃天敘所宜立諸臣何功之有疏論不報高山陽和等衛軍人開墾草場數千頃皆爲豪家占種邦靖奪之歸於官乃上疏略曰公侯之家平原負郭膏腴極望水陸衝要棟梁滿市歲入之利益已饒餘豈應復於邊方爭此微利不過爲鼓鐘之餘緒庖廚之厭棄耳卽今邊儲大困軍餉不繼荷戈之士金玉糟糠饗殮草樹前項地土招人佃種每畝徵糧五升可得千石則一月之閒千人飽食而佃人之利不與焉其於公私不無小補矣未幾大同饑人相食邦靖請帑賑濟部議不許復抗疏論累千餘言部司頗不說邦

靖上疏乞休都御史張文錦疏留曰臣伏見左參議
邦靖學術醇正人品清高乞將本官陞授兵備副使
仍留本道以慰軍民之望未報邦靖再疏乞休疏上
卽去御史許宗魯奏邦靖去狀朱實昌復疏薦略曰
邦靖邦奇學問自相師友綽有淵源名節交相砥礪
豪無瑕玷乞將邦靖病痊起用吏部覆奏上報曰可
西歸之日軍民萬計遮道相留皆泣下曰我等不敢
久留使君願將明年均禧一派而去邦靖亦泣撫慰
而行其爲人所信依如此苑洛先生曰吾弟邦靖才
旣明敏而復勤察初至大同大同積弊之餘法度廢

弛邦靖曰紀綱不立雖有仁恩不行焉卽按權顯不
法者幾人於是號令風行吏貪污者輒去之曰民與
貪吏不兩立不嚴於彼必不能寬於此也性清儉樸
實衣取蔽體公服外終身布素然澁沈有謀略而濟
以勇果之氣慮定而發據理而行排山倒海萬夫莫
禦識見宏遠而濟以英偉之才故事至物來衆方擬
議未定而邦靖已處分矣平居處衆坦夷平易至於
當取與進退死生大節確然不可奪精思絕人童時
先輩試以百餘錢擲地俾一視卽收問之荅曰若干
百試不差與客弈背坐不視枰以口對弈者始終不

差一箸學有淵源幼卽以經濟爲志嘗言人之所以自重而易退者急於進而欲濟時也人所以重生者欲待其死所也不然苟生何爲也敘傳曰迅雷兆變異夢呈祥大同之民思之不忘秦山之崩而靖乃傾惟天地人弗能無同胡於爾壽乃獨弗豐茫茫宇宙恨也何窮鄆杜王九思曰予自京師見五泉子七言絕句詩類杜子美及予罷歸爲予誦其古歌詞浸淫唐初逼漢魏矣觀朝邑志其文章之宏麗者乎夷考其行蓋曠世之英全德之士也乃不壽死嗚呼天邪孰爲五泉子邪

張我華曰五泉先生卒至今二百七十五年我華始克爲先生縣志作注更擴拓先生言行敘述此傳蓋取苑洛先生所爲傳王檢討九思所爲墓誌唐大司

寇龍

所爲墓表樊侍御

得仁

孝弟記而旁參以諸家

之敘述自知疏淺未足發先生之一二然亦可謂曲盡其事矣先生卒年三十六所配屈安人無子有女異嫁秦王子先生詩集當時康對山海序之臨潼趙伯一渭南劉鳳池並刻之然散逸爲不少矣今我華家藏先生著述縣志外詩四卷屈安人詩一卷耳烏呼使天假之年而攝尺寸之柄文章功業豈止於是

而已邪惜哉

朝邑縣志注

韓序七

十

長春外史

朝邑縣志注目錄

一卷 凡四篇

總志第一

風俗第二

物產第三

田賦第四

二卷 凡三篇

名宦第五

人物第六

雜記第七

朝邑縣志注

目錄

長春外史

朝邑縣志注卷一

五泉山人韓邦靖汝慶父撰

長春外史張我華元觀父注

總志第一

朝邑爲縣起自西魏以據朝阪故名朝邑

西魏之先什翼犍晉成帝咸康四年稱代王至孫拓跋珪改國號魏安帝隆安二年稱帝都平城齊武帝永明十年孝文帝太和十七年也遷都於洛是曰後魏梁武帝中大通六年孝武帝修避高歡之難西奔都長安是爲西魏朝阪水經注謂之彊梁原今日華朝邑縣志注

卷一

總志一

一

長春外史

原

古爲冀州之地

兩河閒曰冀州自東河至西河也

殷周時爲芮國有大荔戎

殷芮如詩虞芮質厥成周芮姬姓伯爵厲王時良夫爲王卿士諫王說榮夷公語具春秋傳桑柔之詩見大雅汲冢周書有芮良夫解茲不具錄大荔戎西戎別種

秦厲恭公伐大荔取其王城築高壘以臨晉國更名臨

晉

秦本伯益裔孫封邑非子孫襄公盡有岐豐之地恭
史記作共周貞定王八年厲共公十六年也澗河旁
以兵二萬伐大荔取王城築高壘以臨晉國故曰臨
晉本漢書注臣瓚說

後晉奪河西之地乃以屬晉

晉周成王弟唐叔封國數遷都於絳河西在河水西
也奪地未詳何時王河汀

學謨

作續朝邑縣志謂出

子獻公之亂晉奪河西之地然獻公元年魏武侯三
年也三家分晉久矣猶能奪人之地哉以竹書紀年
考之蓋魏奪之言晉舉舊號也若孟子晉國天下莫
朝邑縣志注

卷一 總志二

二

長春外史

強焉

魏獻河西之地於秦乃復入秦

魏本詩魏國晉獻公滅之以封大夫畢萬地在今山
西解州界事見春秋傳萬曾孫絳徙安邑絳孫斯與
韓趙三分晉國是爲文侯文侯孫惠王徙大梁亦稱
梁惠王子襄王五年當周顯王三十九年盡獻河西
之地於秦王漁洋

土正

曰蒲州永樂鎮春秋時魏地

畢萬所封邑永樂今屬永濟縣

漢爲臨晉縣隸左馮翊有河水祠有芮鄉

漢今漢中府高祖劉邦初王漢中後五年滅項羽都

長安因以漢爲有天下之號左馮翊故秦內史高帝元年屬塞國二年更名河上郡九年罷復爲內史武帝建元六年分爲左內史太初元年改今日同州府郊祀志河祠臨晉故地理志謂臨晉有河水祠芮鄉故芮國在縣南三十里久湮晉亦爲臨晉縣又爲左馮翊治

晉本司馬昭封國魏景元四年以并州之太原上黨西河樂平新興雁門司州之河東平陽宏農雍州之馮翊十郡皆春秋晉地封大將軍昭爲晉公咸熙元年進爵爲王二年昭子炎受魏禪是爲武帝晉之號朝邑縣志注

卷一 總志三

三 長春外史

不改左字衍文魏文帝時馮翊扶風各除左右字也治上脫郡字晉志雍州有馮翊郡也後魏分置南五泉縣

後魏詳見上注太武帝太平眞君七年置五泉縣孝文帝太和十一年析置南五泉縣俱隸華州澄城郡縣北四十里鎌山麓有太奇泉西爲蔡莊泉又西爲象坻泉又西爲雙泉五泉之名以此南五泉者此縣又在泉南也

隋置長春宮尋復爲朝邑縣

隋之先楊忠仕周爲柱國大將軍大司空封隋國公

傳子堅受周禪都長安是爲文帝隋之號不改置置
監也長春官周武帝時築至隋凡行宮所在皆立總
監以司之有監有副監有丞統食貨農圃復爲朝邑
未詳何年

唐亦爲朝邑縣有河水祠西海祠武德中析爲河濱縣
又爲河西縣以隸河中府大歷中復爲朝邑縣隸同州
唐之先出於涼武昭王李暠曾孫熙家武川熙孫虎
西魏時官至太尉周閔帝受魏禪追封唐國公傳孫
淵受隋禪因以唐爲有天下之號朝邑在唐爲四望
河水據唐書作河瀆文誤也唐王延昌河瀆神靈源

朝邑縣志注

卷一

總志四

四

長春外史

公祠廟記略曰中國經瀆河爲長上應析木下朝扶
桑演崑崙踰積石繚大漠經龍門灌注九州之間經
營萬里之外古先哲后罔不欽崇存乎祀典代以爲
常則班固序漢書所謂河祠臨晉是也偉其南直太
華左臨中條渭水過其旁汾睢揭其後風雲相盪精
氣交馳於以禮神事之宜也不然發源自遠地則多
漫胡爲不昭晰於他邦獨受享於茲土前賢經始抑
有其由蓋以在雍州之域通天子之都地旣稱雄禮
云異數天寶歲安祿山稱兵朔裔肆逆東夏賊相張
通儒據有長安賊將崔乾祐固守蒲阪今關內河東

副元帥中書令汾陽郡王郭公時爲兵部尙書門下平章事朔方節度使訓兵誓衆超百二之險謂此邦底定則京師可圖虔禱於河潛軍以往金鼓掩夜渠魁出奔遂收蒲城神所道也及師次渭汭陰霧晦冥公假寢之際夢河神謂曰永豐倉側將有急變不如速退姑以避之比全軍及郊賊已雲合克違寇難神所扶也其後李國貞之遇禍公復總戎故絳僕固懷恩之逆命公又出鎮河東所謀必克無往不平再安叛渙神所相也得一以靈不其宜哉汾陽王深維據我屢崇昭報奉牲玉莫敢愛也致精意未嘗怠也每

獨吉歷選自郊徂宮奠於堂戶之間則神之昆弟具在酌於屋漏之內則神之伉儷攸居盍築館於後以安靈匹乃諮於副元帥副使太子賓客御史大夫知河中府事崔公寓量功命日而後役於河西縣大夫李開不徵貨財不殫日力曾不踰月克復於成內寢旣立神儀穆然於是繫以辭曰浩浩長河中國之紀洪流激射橫致地理蒸雲吐霧薦圖効祉是日經瀆斯爲德水唐聖六葉巨猾挺灾擗邑靡城如霆如雷汾陽矯矯仗鉞而來乃臨蒲阪神實先導乃亂渭水一一胥告嗟我上相神之所勞汾陽之德温恭正直

柔嘉維則忠勤是力秉心泉塞不測不克東西南北
剝絕奸慝入登九命一人是毘出統三軍四方是維
維吉祐之河公降禧衆神在列曾未區別公爲之節
內寢攸設寢廟亭亭中外有經濯濯厥靈妃耦攸寧
於乎祠宇焜耀中土在河之許在城之下刊茲片石
照灼千古西海祠見唐書地理志二祠遺址在太陽
社明時圯於河武德高祖年號武德三年析朝邑地
置河濱縣貞觀元年省乾元三年曰河西縣取春秋
傳晉卻犇盟秦伯於河西河中府今蒲州府大歷代
宗年號大歷三年復爲朝邑縣仍割朝邑五鄉河東

朝邑縣志注

卷一

總志六

六

長春外史

三鄉置河西縣縣東西十四里通典同州有朝邑縣
又有河西縣指此同州故馮翊郡後魏曰華州西魏
廢帝欽三年改義取春秋傳白狄及君同州

迄今因焉而以隸陝西西安府同州

今五泉先生自謂當時正德十四年也自五代宋金
元至此時朝邑之名不易明置天下二京外十三布
政司第四曰陝西西安府爲省會陝西布政司領府
八第一曰西安治長安西安府領州六第三曰同州
同州領縣五第一曰朝邑 國朝雍正十三年陞同
州爲府附郭設大荔縣共領一廳一州八縣第二曰

朝邑

于天文爲參之分野

西方白虎七宿五十一星八十度第七宿曰參十星十度自畢十二度至井十五度凡三十一度內有參十度曰實沈之次春秋傳曰參爲晉星晉在冀州之域五泉先生以縣爲雍州之域井鬼分野然班固地理志野他家以縣爲雍州之域井鬼分野然班固地理志曰魏地觜觿參之分野其界自高陵以東盡河東河內縣故魏地適當其分他說非也

東有大慶關又東至於河東爲蒲州蒲州者山西屬州朝邑縣志注

卷一

總志七

七

長春外史

也
大慶關見下注河源出吐蕃朶思甘西鄙有泉百餘泓方可七八十里沮洳散渙不可逼視登高望之如烈星然名火敦腦兒華言星宿海也羣流奔轉近五七里匯爲二巨澤名阿刺腦兒自西而東連屬成川號赤賓河又合亦里赤忽蘭也里朮三河其流寢大始名黃河又岐爲八九股曰九渡行二十日至大雪山名騰乞里塔卽崑崙也繇崑崙南至闕卽及闕提二地始相屬又經哈刺別里赤兒之地合細黃河及乞兒馬赤二水北行復折而西流過崑崙北又轉而

東北行約二十餘日至積石始入中國五日至河州
二日東北行洮河水南來入河又東北流過達達地
各八百餘里過西受降城折而正東流過達達地古
天德軍中受降城東受降城凡七百餘里折而南流
過大同府保德州葭州及興縣臨縣凡一千三百餘
里與延安河合又南流三百里與汾河合又南流二
百里過蒲州府自河源東北流至蘭州凡四千五百
餘里入中國又東北流過達達地凡二千五百餘里
入山西境又南流至永濟縣凡一千八百餘里通計
九千餘里過縣東蒲州古蒲阪卽元河中府明洪武

朝邑縣志注

卷一

總志八

八

長春外史

二年改取河東縣省入屬平陽府今日蒲州府設附
郭永濟縣山西禹貢冀州之域元改省治陽曲
西有鐵廉山又西有高陽城又西至於干興鋪西爲同
州

廉一作鎌形舉也鐵鎌溝洫志所謂商顏也通典謂
之商原酈道元謂之許原或謂之長虹嶺自大荔來
東絕於河折而西南六十里接華原過縣城西南接
紫陽山折而西絕於洛華原又名莘原其實紫陽華
原一朝阪也王河汀學謨謂是河洛故壩久之河漸
而東洛冉冉南耳良然高陽城知縣王公兆鰲朝邑

縣後志謂是周勃食邑一名懷德城然水經注渭水之北沙苑之南卽懷德故城也沙苑南值懷德北絕洛水此城又在洛北十里可知一名懷德城者誤也干興乾坑也唐德宗興元元年十一月渾瑊及李懷光戰於乾坑卽此

北有長春宮又北有苦泉又北至於金水河北爲郃陽苦泉金水河俱見下注郃陽縣古曰洽陽本有莘氏地隸同州府距縣百里

南有漆沮又南有太白池又南有麻子池又南至於渭南爲華陰

朝邑縣志注

卷一

總志九

九

長春外史

漆沮二池俱見下注渭水源出甘肅蘭州府渭源縣鳥鼠同穴山東行千八百里至仁義邨入縣界經望仙觀南過洛水入於河詳見尙書禹貢華陰縣在渭水南太華山北隸同州府距縣五十里
西南有沙苑城又有九龍池

沙苑城見下注九龍池屬大荔

戶凡八十二里成化末歲大饑民多餓死又多亡去乃更爲七十二里正德五年又去其七里今爲六十五里云

一百一十戶爲里戶有遞減里名猶今成化明憲宗

年號二十年二十一年大侵人相食大徙王河汀學
謨說正德明武宗年號

縣先在西原上有相地者云城居高而左下法不利知縣後其言稍稍驗乃更移置原下然無城景泰初知縣申閏築焉方三里有奇東門一西門二北無門南門一西原華原明太祖吳元年改尹曰知縣正七品金大定年縣移原下景泰明代宗年號閏築城在景泰二年然起西門迄縣治而止成化三年知縣郭公良十七年知縣李公英薦增雉陴五泉先生後嘉靖二十一年知縣劉公尙義開拓東城方四里尋開北門起

朝邑縣志注

卷一

總志十

十

長春外史

麗譙東曰臨河後改陽稌今日熙春西曰鎮羌西之北曰金湯南曰望嶽北曰迎恩卽今城也嘉靖三十四年地震城復於隍嗣是屢修屢圯乾隆四十六年七月初二夜河溢自隄澣厓下來入迎恩門支者夾元武閣折而南入臨河門餘波南流西折入望嶽門城內東半浸焉明年知縣今湘潭朱公廷模勸富室襄功葺城東南北甃以磚五十年七月十八日河又溢一如往歲明年署知縣今興安知府祥符周公世紹請帑繚以土堤北起長春官厓下迎恩堡南止龍尾溝如偃月知府陽曲馮公思忠以城垣隳缺仍勸

邑人捐貲以我華董厥役重事完葺十旬畢功頗稱
完固云

城中東偏爲縣衙

今正在城中嘉靖中拓東城故也衙建自金大定年
中爲節愛堂堂後爲知縣宅堂前儀門儀門前大門
舊有臺有樓知縣王公光鰲改今式大門內東爲常
平倉倉後爲典史署署北爲廩本丞署以伏尸不利
移於節愛堂西又西爲簿署二署久廢二署之南當
儀門西內犴陞在焉

縣衙南爲西安行府

朝邑縣志注

卷一

總志十一

十一

長春外史

府或作署今爲市廛

府南爲儒學文廟在焉

儒學門西向內學官門南向過儀門爲明倫堂堂後
東西廂各三間內堂五間明倫堂之東教諭署西訓
導署學署之東入玉振門過鄉賢祠入戟門門北大
成殿殿前東西廡殿後崇聖祠祠東薦牧亭亭南射
圃圃南奎文閣閣後西入金聲門當戟門左名宦祠
在焉南去爲櫺星門門之南爲泮池夾泮池爲德配
天地道冠古今二坊此乾隆五十七年我華董工重
修改建者非舊式也

儒學南爲按察分司西爲布政分司

按察分司拓東城後改爲部使行臺南新倉其舊址

移分司於縣治東陬乾隆三十四年知縣楊公衍嗣

改建華原書院四十六年河湓院圯五十二年我華

以城工餘貲移建書院於華原東岑而舊基爲墟布

政分司今爲民居

布政分司北爲城隍廟城隍廟北爲陰陽學及醫學

廟近西門明縣丞禮建洪武十七年天下縣設陰陽

學訓術一人醫學訓科一人皆設官不給祿二學今

有員無所

朝邑縣志注

卷一 總志十二

七

長春外史

倉凡三所一在縣

儀門外東偏倉廩十八間知縣王公兆鰲增爲二十

五間

一在學

卽南新倉拓廣之

一在城西原上

卽仰倉在華原之麓當今華原書院之東下王河汀

學謨曰亡慮萬石頗稱殷積不知何時易爲民舍損

已成而虛耗見矣今日全中砦俗名倉道

壇凡三所社稷壇在城西北山川壇在城南邑厲壇在

城北

三壇今如故

草場二所一在城西一在山川壇東

場久廢

養濟院在城南

久廢康熙五十一年知縣王公

兆鰲

於城內西南隅

建房四十間以居五十五名口孤貧內有王公肖象

今盡爲流遣人犯所居又不知起自何時也

教場在城東桑棗園在教場西

今皆屬城內東偏先爲民居乾隆四十六年五十年

朝邑縣志注

卷一

總志十三

三

長春外史

河溢入城居民發屋四徙成廢墟焉

漏澤園在山川壇南

本明高御史翔先塋文皇殺翔又發掘翔先塋雜牛

馬骨焚灰揚之而以其地爲漏澤園久湮然乾隆三

十五年知縣太谷吳公

忠誥

修元武閣掘地得石闊

尺長三之有澤園二字漏字只餘其半後有知縣山

陰陳公

昌言

題名

鋪凡一十八所在城者一

縣門左曰總鋪

城西者二

十里孤店十里干輿卽乾坑西通同州今省改王家莊鋪兵三名

城東者三

十里東屯今渡河十里火家八里大慶關東達蒲州今省火家鋪鋪兵共六名

城南者三

十里新市渡洛十里趙村十里倉頭渡渭南達華陰潼關今省新市鋪鋪兵共六名

城北者五

十里官莊十里白冢十里龍池十里大奇十里王雁

朝邑縣志注

卷一

總志十四

古

長春外史

過金水北達郃陽今存白冢太奇二鋪鋪兵共六名西北者三

曰里雀曰苦泉曰平羅以達澄城今省里雀鋪鋪兵共六名俱明洪武年縣丞禮建據志數止十七所

社學凡三十所一在城一在柳邨一在新市鎮一在趙渡鎮一在趙邨一在南陽洪一在永興鎮一在太慶關一在白冢一在龍池一在龍門邨一在白邨一在辛城寨一在兩女鎮一在倉頭一在救駕莊一在許邨一在顧現一在延壽一在王家莊一在八里莊一在泊子邨一在嚴伯一在步昌一在苦泉鎮一在霸城一在小伏

坡一在白池一在小邨

缺一所明嘉靖中地震諸學並廢今西河書院卽在城社學白冢在縣北二十里以唐白馬將軍墓得名將軍姓扈名鏐德宗時來守河橋卒遂葬焉今冢在鎮城北倉頭在縣南少西二十五里故延祥鎮隋之永豐倉也煬帝大業十三年唐高祖起兵太原九月甲子次長春宮丙寅隴西公建成劉文靖屯永豐倉卽此小邨卽小荀里在縣北十五里有荀丞相墳不知何時人王河汀學謨曰小荀里墳鄉人發掘見棺九具洞施丹青擬於王者本魏文侯庶子繁也柳邨

朝邑縣志注

卷一

總志十五

五

長春外史

趙渡泊子邨嚴伯皆在縣南龍池兩女延壽八里莊步昌小伏坡白池皆在縣北白邨顧現王家莊霸城皆在縣西救駕莊許邨故在縣東今沒於河永興鎮久廢辛城寨未詳餘俱見下

大慶關在縣東三十里卽古蒲津關

竹書紀年作蒲坂關史記作臨晉關宋改今名關故有城兵衛甚設東魏天平二年高歡遣庫狄溫守封陵築蒲津西岸久圯明嘉靖二十年以寇警巡撫北邨路公委西安同知句容朱光霽復築新城周一千二百步高二丈五尺厚下三丈頂二丈苑洛先生記

其事王河汀學謨曰關故稱風物佳美居民至三千七百餘家大都殷富慨自乙卯地圯地勢卑下自是河溢四面而至居民發屋四竄今才二百餘家耳惜哉華憶乾隆初年關之庶富一如河汀所云至四十六五十年河溢土高於屋田盡成沙草木不生人民死亡戶餘數百斯又一變也

今設巡檢司隸潼關衛又置稅課局

巡檢司巡檢從九品主緝捕盜賊盤詰奸僞明洪武二年於府州縣關津要害處設置俾率徭役弓兵警備不虞潼關衛在縣東南六十里古曰桃林塞後改

朝邑縣志注

卷一 總志十六

六

長春外史

縣今分設同州府鹽捕同知曰撫民廳稅課府曰司縣曰局置大使一人從九品典稅事凡商賈僧屠雜市皆有常征以時權而輸其直於府若縣明初改縣官店爲稅課局巡檢司乾隆八年省三十八年重設主簿駐大慶關先是雍正七年稅課局員裁稅歸巡檢司巡檢司又省稅歸同州府準知府養廉有局無員矣

關東卽黃河西岸

河自龍門南下依蒲州府城西南流故關在河西明萬歷二十六年河一夜潰岸西徙關反居河東而再

設新關於河西

岸去水不甚高然不溢他處或高四五丈輒溢土人以爲鐵牛鎮河故不溢鐵牛者唐時鑄鐵爲牛置河兩岸岸各四牛各重數萬斤下爲鐵山尾施鐵軸以繫浮橋旁置鐵人以象繫牛

春秋傳秦后子造舟於河卽浮橋也東魏常造三道浮橋渡河唐六典謂造舟之梁四河則蒲津張說蒲津橋贊曰易曰利涉大川濟乎難也詩曰造舟爲梁通乎險也域中有四瀆黃河居其長河上有三橋蒲津是其一隔秦稱塞臨晉名關關西之要衝河東之

輻輳必由是也其舊制橫亘百丈連艦千艘辦竹竿以維之繫圍木以距之亦云固矣然冬冰未合春冰初解流澌崢嶸塞川而下如礎如臼如堆如阜或撻或搥或磨或切綆斷航破無歲不有雖殘渭南之竹仆隴坻之松敗輒更之罄不供費津吏咸罪縣徒告勞以爲常矣開元十有二載皇帝聞之曰嘻我其慮哉乃思索其極敷祐於下通其便使人不倦相其宜授彼有司俾鐵代竹取堅易脆圖其始而可久紓其終而就逸無疆惟休亦無疆惟恤於是大匠歲市百工獻藝賦晉國之一鼓法周官之六齊飛廉扇炭祝

融理爐是鍊是烹亦錯亦鍛結而爲連鎖鎔而爲伏
牛偶立於兩岸襟束於中渾鎖以持航牛以繫纜亦
將厭水物莫浮梁又疏其舟閒畫其蠲首必使奔澌
不突積凌不隘新法旣成永代作則原夫天意有四
旨焉濟人仁也利物義也順事禮也圖遠知也仁以
平心義以和氣禮以成政知以節財心平則應諧百
神矣氣和則感生萬物矣政成則又文之經矣財節
則豐武之德矣故天將儲其禎地將阜其用人將盈
其力聖皇之道乾坤翼翼觀藝而無窮詠功而無極
宋嘉祐中河漲橋壞盡曳西岸牛於河元有僧懷丙者
朝邑縣志注

卷一

總志十八

六

長春外史

乃爲機法取牛河中已得三牛會有言取牛不難者丙
怒棄去後人用其法取牛然牛竟不出今西岸止存三
牛其一牛乃在河中始河漲時并壞岸元鐵判院仝僉
條築焉

宋太祖姓趙氏諱匡允受周禪傳弟光義是爲太宗
太宗孫仁宗在位四十一年改元者九嘉祐第九元
宋史五行志太平興國六年河中府河漲陷連隄又
張燾傳燾爲陝西都轉運使蒲津浮梁壞鐵牛皆沒
水中燾以策列巨木於岸以爲衡繩石其秒橋復其
初嘉祐河漲史無明文未詳元有僧元字衍文宋史

方伎傳懷丙正定人巧思出天性非學所能至正定
構木爲浮圖十三級勢尤孤絕旣久而中級大柱壞
欲西北傾他匠莫能爲懷丙度短長別作柱命衆工
維而上已而却衆工以一介自從閉戶良久易柱下
不聞斧鑿聲趙州洩河鑿石爲橋鎔鐵其中自唐以
來相傳數百年大水不能壞歲久鄉民多盜鑿鐵橋
遂歆倒計千夫不能正懷丙不役衆工以術正之使
復故河中府浮梁用鐵牛八維之一牛且數千斤後
水暴漲絕梁繫牛沒於河募能出之者懷丙以一大
舟實土夾牛維之用大木爲權衡狀鈎牛徐去其土

舟浮牛出轉運使張燾以聞賜紫衣元之先曰蒙古
宋寧宗開熙二年鐵木眞稱帝於斡難河是爲太祖
至世祖忽必烈改國號元宋末帝祥興二年始紹大
統置樞密院掌天下兵甲機密之務延祐四年定同
僉二員正四品院判二員正五品有征伐之事則置
行樞密院大征伐則止曰行院爲一方一事而設則
稱某處行樞密院陝西未見置院鐵判院或院判之
錯全與同同韓旣列院判于同僉之上惟具其姓而
同僉姓名俱逸志經翻刻或有脫誤無從考證今牛
全沒於河岸潰於明每河溢直瀉關當其衝辟之建

甌必無幸矣

西北爲大荔戎城卽王城左傳陰飴生與秦伯盟於王城卽此地後改爲武鄉今廢

王城在縣北久廢寰宇記謂大荔戎王之城或謂秦晉置王城爲盟會之地未詳其審陰飴生事見春秋傳僖公十五年與傳作會杜預釋例土地名云馮翊臨晉縣東王城今名武鄉北史高構傳馮翊武鄉女子焦氏旣啞又聾爲人所犯生男六歲莫知其姓於是申省構判曰母不能言窮究理絕案風俗通姓有九種一氏於居此兒生在武鄉可以武爲姓然則武朝邑縣志注

卷一

總志二十

三

長春外史

鄉至周隋不改

唐元宗過蒲關詩云鐘鼓嚴更曙山河野望通鳴鸞下蒲坂飛蓋入秦中地險關愈壯天平鎮尙雄春來津樹合月落戍樓空馬色分朝景鷄聲逐曉風所希當道泰非復候繻同

元宗明皇帝諱隆基睿宗第三子詩題本作早渡蒲津關徐安貞奉和聖製早度蒲津關仙仗臨秦甸虹橋闢晉關兩都分地險一曲度河灣路得津門要時稱古戍閑城花春正發岸柳曙堪攀後乘猶臨水前旌欲換山長安迴望日宸御六龍還張九齡奉和聖

製早度蒲津關應制魏武中流處軒皇問道回長隄
春樹發高掌曙雲開龍負王舟渡人占仙氣來河津
會日月天仗役風雷東顧重關盡西馳萬國陪還聞
股肱郡元首詠康哉五泉先生渡河篇河之水何湯
湯河之澣不可忘岸有蒲兮洲有葦昨日渡兮今日
歸同舟之人知我者稀

漆沮一名洛水自耀州同官縣來至朝邑東南三十里
入渭成化中乃崩入河

漆水出西安府同官縣西北北高山東南流至神水
峽受銅官川水又南受雄同川水又西南受雷平川

朝邑縣志注

卷一

總志二十一

三

長春外史

水又西南過耀州尹師澗經州城東五臺山循東乳
山西合沮水沮水出鄜州中部縣北子午嶺有谷河
及子午水自西北來入焉經宜君縣東北界來西南
至楊秀川名宜君水又南受鄭川水過唐家店受大
峪河又南過耙樓山受紙房河又南受姚谷河又南
受石觜河又南受府西河又南入同官縣境爲梁寨
河又南受同家河又南受呂邨河又西南受沙羅水
又南至蘇家店入耀州境爲堰頭河又南受胡思泉
名沮水過錦陽川經州城西循西乳山受梁家泉東
合漆水東南流去州城三里出鶴鵲谷入富平縣境

名石川河又東南過北陸原受北陸川水又南受薄
臺川水又南受溫泉水與澤多泉水又西南經科子
頭合趙氏河卽澗谷河南流至相橋合清谷水卽清
河注於渭禹貢所謂過漆沮者此也洛水出慶陽府
治東北白於山經延安府定邊安塞保安甘泉之西
鄜州之東洛川之西南中部宜君之東北同州府白
水之西蒲城之東澄城大荔之西經縣西南二十里
過望仙觀東南入渭先是洛自縣南經華陰縣西北
葫蘆灘入渭成化中自趙渡鎮徑入于河蓋入河入
渭惟視河之東徙西徙河東依首陽山則西去趙渡
且將五十里故洛水經趙渡南過街子里望仙觀東
南入渭河若西徙則趙渡正在河北街子里望仙觀
皆爲河之西岸洛水故道悉爲河有不得不於趙渡
入河耳嘗疑唐虞之際洛故入河故禹貢導渭不言
過洛西漢亦然東漢則又入渭故班固許慎說洛所
入不同我華三十年來已見洛之四入河五入渭矣
張我華曰洛與漆沮源委大異志偶用舊說未及詳
攷耳蓋自禹貢導渭條有又東過漆沮入於河一語
而後世之說洛漆沮者多舛錯附會以求合乎經而
卒不可合也尙書孔安國注漆沮二水名亦曰洛也

在馮翊北今同地理志浸曰渭洛下師古曰洛即漆

沮也在馮翊二說混同未辨禹貢指南引十三州志

漆水出漆縣今麟遊西北岐山東入渭此自說函漆與同官之漆

無涉尚書正義引關中記漆水在長安西南鄠縣入于

渭此在豐涇之上與禹貢節次不同寰宇記沮水自坊州今鄜州地昇平

縣今中部北子午嶺出下合榆谷慈馬等川遂為沮

水至華原縣今耀州合漆水極為詳確至同州朝邑縣東南

入渭誤同顏孔又雍錄洛自入塞經鄜坊同三州遺

延安乃始入渭詳確沮水自邠州東北即中部來至華原

縣南流合漆詳確入富平縣石川河當云入富平縣境為石川河乃得

朝邑縣志注 卷一 總志二十三 三 長春外史

漆水自華原縣東北同官縣來南流入富平縣石川

河亦當云南流合沮入富平縣境為石川河乃得漆在沮東至華原而西乃

始合沮沮在漆西分析更極清確既已受漆則遂南東而合

乎洛誤矣南東而行三十里至富平縣莊里鎮崇岡連亘盡在石川東岸將從何道而合乎洛也

洛又在漆沮之東當確至同州白水縣與漆沮合大誤

之為石川東去蒲城之洛一百五十里原陸橫亘欲合不能而乃欲合白水之洛乎白水又在蒲城東北

也而相與南流以入于渭洛自蒲城以南至入渭地並無一衣帶水來入也

理志北地郡歸德今慶陽府地下洛水出北蠻夷中入河

此時河或西說文洛字下水出左馮翊今同歸德北

夷中東南入渭此時河或東水經沮水下沮水出北

經望仙觀

地

今慶陽府地

直路縣

今宜君縣

東過馮翊

設禰縣今同官地

北

東入於洛說文瀘

側加切

字下水出北地直路西東入

洛合諸家之說觀之班固許慎考據爲詳安國師古誤在混同毛晃穎達失于妄引寰宇雍錄下流不審惟桑欽之釋沮水許慎之說瀘字或以啓後人之誤乎乾隆五十八年予有事於鄜時道出中部一水自西北來過縣南門東經橋陵軒轅黃帝廟又東北流而注洛土人呼爲縣河土人書作沮水沮瀘字本一體聲又轉通桑許言入洛者其卽此與後人言漆沮入洛者誤由此與自此迤南百里皆高原大坂過烈

朝邑縣志注

卷一

總志二十四

音

長春外史

泉鋪入神水峽漆經其中南流一百三十里至耀州而合于沮杜詩所謂連天走窮谷者也西來之水別無越峽入洛之理故酈道元欲以鄭渠

在耀州南

當漆水

而樂史程大昌暗用其說明史知其不可乃於地理志富平下云西北有漆沮水舊經白水縣入洛自鄭渠湮廢不復東入洛所謂調亭之說無足據也我華生長關輔聞見頗審故旣爲注釋又引諸說細疏詳辨非敢妄議前修亦庶乎山川原委有所攷究不致久混云爾

水北有新市鎮宋元置稅監又有饒益寺

稅監卽稅務宋史食貨志商稅凡州縣皆置務關鎮亦或有之大則專置官監臨小則令佐兼領諸州仍令都監監押同掌元太宗始立徵收課稅所命各處官司選有產有行之人充之寺梁天監中建唐貞觀二年起十三層浮圖明嘉靖中地震浮圖傾爲瓦礫王大樸三省有饒益寺修塔賦並詩在五泉先生後不錄

寺中舊有藏春鳴貯古名賢石刻今不存

營居爲鳴明初潼關修水關當事者以石刻充用古物盡亡

朝邑縣志注

卷一

總志二十五

三

長春外史

獨殿壁上有宋賈炎諸人題名石

宋賈炎題名先考成正公留題顯謨閣待制提舉南京鴻慶宮賈炎政和三年歲在癸巳夏五月蒙恩罷延帥領真祠奉母歸居潁昌與諸子公說公燮公傑公轍公節公諱公烈公協公頡諸孫適運姪孫道同

過此寺二十九日題政和五年夏自鄜延帥蒙恩從請移守南陽九月二十七日侍親過饒益寺顯謨閣待制新知鄧州兼京西南路安撫使賈炎題諸子公哲公燮公轍公節公諱公烈公協公頡諸孫隨德壽德隆侍行呂元明馬鈞偕來宣和九年四月初八日

男承務郎充專一總領措置陝西路鑄錢司準備差使公傑親摹上石河中府張崇智刊

我華

按賈炎字

長卿左僕射昌朝從子以昌朝蔭更歷筦庫積遷至工部侍郎政和中以顯謨閣待制知應天府徙鄆州永興初陝西行鐵錢久幣益輕蔡京設法盡斂之更鑄夾錫錢幣積重京去相轉運使李諲陳敦復見所斂已多遽請罷鑄鐵錢既復行其輕如初自關以西皆罷市民不聊生炎獨一切施禁聽從其便其後宣徽使童貫又以兩者重輕相形遂盡廢夾錫不得用民益以爲苦炎徙知延安因表言錢法屢變人心愈

惑今人以爲利者臣見其害以爲是者臣見其非中產之家不過蓄夾錫錢一二萬既棄不用則惟有守錢而死耳邊疇生理蕭條官又一再變法廊延去敵迫近民殊不安民不安則邊不可守願得內郡以養母乃命爲潁州未行復留又與貫制疆事不合貫沮之改河陽又改鄧州加直學士知永興入對留爲工部侍郎貫簽書樞密院河西北兩房侍從邀炎俱往賀炎曰故事無簽書兩房者彼非執政何賀爲會以疾卒年五十八贈銀青光祿大夫又宋謝卿材題名朝散大夫臨淄謝卿材仲適元豐癸亥被詔自歷下

移守馮翊三月二十六日過饒益寺題主持賜紫崇智立石蒲人眞元亨模刻

金趙抃記曰左馮之東南踰三十里縣曰朝邑由縣之直南林木蓊鬱小徑縈紆約有十里有鎮曰新市鎮有寺曰饒益乃陝右之名藍也路當秦晉要衝枕山河之形勢自唐宋以來名臣賢士經由往返莫不稅駕投榻於此或題名於壁或留詩於碑不可勝數前後主僧慮歲漫滅悉勒之於石寺遭兵火焚毀殆盡如前人石刻往往埋沒於頽垣遺基之下抃承乏命領鎮事至此恨不及見饒益全盛之時實爲不足每暇日命童僕事鋪

朝邑縣志注

卷一

總志二十七

宅

長春外史

築按挾之荆藜瓦礫之間雖獲名公大臣之行記詩刻例皆斷折譌缺讀之令人悲惋卽其稍完者萃而置之于藏春鳴壁冀後之游觀者興葺之不替然周覽環視必思其人焉時阜昌癸丑九月初一日東萊新市監趙抃記

金之先曰女眞宋徽宗政和五年完顏旻稱金建元收國初起遼東遷都於燕再遷於汴宋高宗紹興元年歲在辛亥僞齊劉豫建元阜昌癸丑阜昌三年也至丁巳豫亡然則抃官在僞齊時其人其文均無可取五泉先生備錄之者或爲饒益備典故耳稱金豫

金所立也記石在今佛殿之南壁字劣而多譌亦非
抃之舊物矣東萊二字當在新市監下乃得

馬坊頭在縣西南十五里唐宋沙苑牧馬及上供牛羊
皆置監於其地

馬坊監牧之所也唐置八坊四十八監凡馬五千爲
上監三千爲中監餘爲下監杜甫詩苑中驟牝三千
匹則沙苑屬中牧監其官領以太僕卿有監副監丞
簿錄事府史典事掌固等掌羣牧孳課宋初置牧龍
坊景德二年改諸州牧龍坊悉爲監賜名鑄印以給
之在外之監十有四同州曰沙苑諸州有牧監知州

通判兼領之諸監各置勾當官二員又置左右廂提
點隸於羣牧司而察其登耗後諸監多廢惟沙苑獨
存然唐兵志八坊之地在岐幽涇寧之間未嘗在沙
苑也不審何時復置百官志太僕寺卿下諸牧監條
注沙苑監掌畜隴右諸牧牛羊給宴祭及尙食所用
其官自監以下品數如下牧監沙苑一名沙阜在渭
北洛南東西八十里南北三十里西魏時宇文泰已
置監參養隴右牛羊諸蓄以供上方之用見魏書唐
杜甫沙苑行曰君不見左輔白沙如白水繚以周牆
百餘里龍媒昔是渥洼生汗血今稱獻於此苑中驟

牝三千匹豐草青青寒不死食之豪健西域無每歲
攻駒冠邊鄙王有虎臣司苑門入門天廄皆雲屯驢
驢一骨獨當御春秋二時歸至尊至尊內外馬盈億
伏櫪在坳空大存逸羣絕足信殊傑侗儻權奇難具
論纍纍隄阜藏奔突往往坡陁總超越角壯翻同麋
鹿遊浮深簸蕩鼉鼉窟泉出巨魚長比人丹砂作尾
黃金鱗豈知異物同精氣雖未成龍亦有神

沙苑城在馬坊頭西廣可數十里卽宇文泰敗高歡唐
王重營敗邠寧朱孜處今歡所種柳不存低凹處乃多
白楊

朝邑縣志注

卷一

總志二十九

五

長春外史

城久廢宇文泰代武川人卽後周太祖文皇帝時仕
西魏爲丞相錄尙書事安定郡公高歡渤海蓀人卽
北齊高祖神武皇帝時仕東魏爲大丞相太師梁武
帝大同三年西魏大統三年東魏天平四年也歡率
衆十萬度河涉洛軍於許原西十月壬辰泰軍至沙
苑癸巳用李弼計移東十里據渭曲背水東西爲陣
李弼爲右拒趙貴爲左拒命將士偃戈於葭蘆中間
鼓聲則起歡見泰軍少競馳而進泰鳴鼓士皆奮起
大破之歡跨橐駝就船以歸泰於戰所準當時兵士
人種樹一株以旌武功王重營唐書本作重榮文誤

也太原祁人以破朱溫黃鄴功繼李都爲河中節度使再與楊復光李克用平黃巢復京師累加檢校大傅琅邪郡王邠寧節度使乾元二年置領邠寧慶涇原鄜坊丹延九州大歷三年罷十四年復置邠寧慶觀察使尋復爲節度使朱孜宜作朱玫文誤也幽州人少以材武爲州戍將廣明二年與巢賊戰開遠門槍洞咽不死以多擢晉州刺史進幽寧節度使賊平授同中書門下平章事封吳興侯中人田令孜怒重榮據鹽池之饒徙重榮充海節度使以王處存代之重榮劾令孜離開方鎮令孜遣幽寧朱玫以神策軍

合鄜延靈夏軍三萬壁沙苑重榮以河中兵合李克用與玫軍戰沙苑玫大敗奔幽州神策軍潰還京師僖宗蒼黃走鳳翔再幸興元玫乃劫嗣襄王煊爲帝自號大丞相後爲王行瑜所殺傳首興元重榮至光啓三年亦爲部將常行儒所殺今歡宜作今秦文誤也柳當時以爲樹柳也凹本音浥縣人讀若窳白楊獨搖性勁直宜屋材五泉先生詩青青沙苑柳枝葉何繽紛鬱鬱佳人思行行壯士勲日暮鴻雁來牛羊亦成羣宿食澗邊草飛鳴洲渚雲懷人不可見往事空爾聞

太白池在馬坊頭西南三里角回可十餘里洞然渙黑其上常有雲氣亦能致雨池中有大鯿嘗食飲馬人以爲神

明嘉靖中地震池且平蕪人爭種植閒者水稍稍如故今復乾竭矣

池北爲蓮池

明萬歷中爲風沙所沒蓮下宜有花字

麻子池在太白池正北五里池回長可二十里多蓮開花爛然映雲日

五泉先生詩茅舍西南麻子池自操小艇載漁絲卽

朝邑縣志注

卷一

總志三十一

三

長春外史

今僕馬多塵土腸斷青蒲雨後時池旱則竭潦則溢所謂蓮花今無一莖矣

池東南有安靖寺唐元宗祀汾時駐蹕寺中

寺故址瀕渭元至正元年沒於渭明正德中改建王林邨正東今在邨南元宗在位四十五年兩祀汾陰開元十一年二月壬子如汾陰祠后土三月辛未至自汾陰二十年十一月庚申如汾陰祠后土十二月辛未至自汾陰蹕趨同皇帝輦左右侍帷幄者稱警出殿則傳蹕止行人清道故謂天子所止曰駐蹕蹕未詳何年祀唐書作祠汾下脫陰字

今殿前有大柏樹懸宋崇寧中所鑄鐘

崇寧宋徽宗年號鐘銘曰維大宋崇寧四年歲次己酉十月二十五日鑄同州朝邑縣魯苑鄉淨安禪院鑄鐘願所集吉利者皇帝萬歲重臣千秋文武百寮常居祿位法界衆生同成佛果主持院主僧惠崇又有助緣僧法基等鑄鐘功德主僧法淵助緣施主十四都十六都十五都保正副正休没弓手節級鎮將等號其人有李三郎李言趙氏趙三伯衛八哥小阿嫂嚴大伯五婆劉十三等名稱後有題名多殘缺惟將仕郎知縣事呂省山猶存但寺名安靖鐘銘淨安

朝邑縣志注

卷一

總志三十二

三

長春外史

禪院未詳厥由銘文魯苑宜作洛苑蓋北人讀入聲多不能審是以譌也

九龍池在縣西南二十五里池東有霸城寺

寺名聖壽在霸城邨邨當洛水南厓寺創建未詳

寺東北有靈應觀仙人張三丰嘗惕觀中今爲道會司

寺東北十七里過洛水北厓曰簸箕掌卽紫陽山南

麓在縣西南三里宋眞宗祥符四年建觀張三丰遼

東懿州人名全一一名君寶三丰其號也以其不飾

邊幅又號張邈邈頤而偉龜形鶴背大耳圓目鬚髯

如戟寒暑惟一衲一簔所啖升斗輒盡或數日不食

或數月不食書經目不忘游處無恒或云能一日千里善嬉諧旁若無人明太祖故聞其名遣使覓之不得永樂中成祖遣給事中胡濬偕內侍朱祥齎璽書香幣往訪遍歷荒徼積數年不遇或言三丰金時人元初與劉秉忠同學後學道於鹿邑之太清宮然皆不可考天順三年英宗賜誥贈爲通微顯化真人終莫測其存亡也予聞之父兄云一日大雪靈應觀道侶見藍縷道士投宿殿檐下明日視之雪中留一足跡不知所往殿壁上大書一律云披雲履水謁橋陵翠柏烟寒玉露輕袞冕霞飛天地老文章星煥海山

朝邑縣志注

卷一

總志三十三

三

長春外史

青巍巍鳳關迎仙侶渺渺雲車駐帝城寂寞瓊臺遺漢武一輪皓月古今明蓋爲謁橋陵而作也縣人雷午天于霖草書刻石今在觀中觀中有鐘銘曰維大元國安西府路同州朝邑縣紫陽山十方元都靈應宮住持道士張志瑀等至元二十一年歲次甲午二月日置不知改宮爲觀又自何時明洪武十五年天下置道會司道會一人設官不給錄

自九龍池東至于趙渡鎮漆沮經焉

洛水也自池北東經霸城王謙沙底南馬南陽洪五邨之北水東卽趙渡鎮

濱水皆種桃樹二三月時兩岸桃花紛然三十里不絕
五泉先生詩漆沮河邊兩岸沙繞隄十里盡桃花春
風總使隨流水落日猶堪鬪彩霞十里晴烟散薜蘿
輕寒輕暖試春和柳眉杏臉桃花淚各有春愁誰最
多今自南陽洪至上官邨南岸一曲十五里桃柳間
栽每歲仲春桃紅柳綠遊人如蠶爲邑中名勝

長春宮在縣西北原上

出金湯門過古大西關折而北二里而近遺址猶存
土人謂之古城

後周宇文護所築隋文帝置殿其上以瞰河華洛渭官
朝邑縣志注

卷一

總志三十四

三

長春外史

下花木四時茂盛如春故名長春

後周之先有烏菟者雄武爲鮮卑十二部落大人其
後普回立國號曰宇文卽以氏焉裔孫泰西魏時太
師大冢宰安定侯傳子覺封周公受西魏禪是爲後
周宇文護泰兄邵惠公顥之少子封晉國公築宮在
保定五年見十道志隋文帝開皇十六年十月己丑
幸長春宮俯視曰瞰河在宮東華洛渭在宮南
唐高祖起兵太原西定長安休士於此

隋煬帝大業十三年六月高祖傳檄諸郡稱義兵七
月誓師九月濟河次長春宮十一月克京城唐蘇頲

奉和聖製至長春宮登樓觀稼帝跡奚其遠皇符之
所崇敬時堯務作盡力禹稱功赫濯惟元后經營自
左馮變蕪香稻實流惡水泉通國阜猶前豹人疲詎
昔熊黃圖巡沃野清吹入離宮是閱京坻富仍觀都
邑雄憑軒一何綺積溜瀉晴空禮節家安外和平俗
在中見龍垂渭北辭雁指河東睿思方居鎬宸遊若
飲豐寧誇子雲從祇爲獵扶風于武陵詩莫問古宮
名古宮空古城惟應東去水不改舊時聲五泉先生
詩朱雲依峻宇丹亭倚危岑太華阻前眺長河來左
襟芬芳鬱南苑繁翠交中林楊隋正全盛文皇何荒
淫彩鸞華棟落仙仗錦官臨賞心期晏暮佳名耀昔
今物理更變化歲序互升沈安得四時好遊覽說君
心晉陽旣乘勝唐兵亦何深旛麾惕此室羆虎多如
林傷哉王氣盡榛莽相追尋

東有金龍寺僧會司在焉

出金湯門折而南西入金龍堡躡磴道至金龍寺唐
貞觀元年建層臺阿閣浮圖梵宇拂樹插雲每微雨
初晴秋月弦滿登臨覽眺則見西枕華原東揖中條
北鎌南華左右環拱黃河洛渭前後交流縣中名勝
無以過此先高祖提學公諱好奇有碑記明洪武十

五年天下縣置僧會司僧會一人設官不給祿
西有元王由義墓

墓在寺西北三里墓上有王氏世德序碑翰林侍講
學士歐陽元圭齋制文翰林學士承旨巉巉子山書
丹碑陰刻子山尺牘作行草有晉人風骨明萬歷閒
碑毀今碑非復子山之舊矣元序云人子以顯親爲
貴述懿行而掄揚之固孝矣而未受命於君也惟所
欲爲者旣得上旨奉命詞臣爲文尤爲榮幸至元五
年八月從上京以是告諸奎章閣大學士沙臘班侍
上清燕以由義之悃從容奏陳且請屬筆翰林侍講

朝邑縣志注

卷一

總志三十六

三

長春外史

學士臣元製文以其事關孝治之一特賜開允沙臘
班出諭旨由義惶遽無措退而再思曰是盛典也非
小臣宜蒙旣而謀諸知己曰有君命矣不敢廢也明
年由義除大都副留守又明年遷彰德路總管乃奉
八牘移元言所以遲回却顧之狀於是元奉命考其
家乘而爲之序曰王氏其先京兆之同州朝邑縣都
仁鄉人也中葉避兵遷平陽城中已而復還今譜牒
可考者七世府君諱敦娶李氏第一世也諱君寶兩
娶楊氏一娶李氏第二世也諱仲濟娶李氏諱巨川
娶党氏諱濟川娶劉氏昆弟三人者第三世也諱子

山娶張氏第四世也亦有二弟焉長逸其諱娶石氏次諱仲瞻娶趙氏四世以下以由義貴始有封爵贈中順大夫禮部侍郎上騎都尉追封太原郡伯亨字伯通由義之祖考追封太原郡君雷氏其祖妣也張氏其繼祖妣也贈翰林直學士亞中大夫輕車都尉追封太原郡侯珍字君玉由義之先考也追封太原郡夫人郭氏其先妣也雷氏其繼妣也張氏今在堂其繼母也禮部公幼業儒平生所抄書甚多今篋笥猶有一二存者鄉之老父往往能言其風軌國家初得中原吏治草創受徵辟爲縣幕官持受端楷每與

時尚異同棄去遂不復仕傳至翰林公克世其業性尤寬厚長者壯歲勤儉家致粗饒而好善樂施出於天性未嘗以豐約介意人有貸或貧不能償必毀其券鄉里有爭得其一言曉析無復終訟遇異母弟瑞備極友愛瑞聚陳氏賢淑及公之子幼失其母陳氏夫婦遇之亦有恩不忘公之惠也藏獲服役歲久召而良之晚年延名師教其子學曰吾以是遺爾何啻簞金泰定二年七月以疾卒壽五十有八四年七月十三日葬於南原先塋之西北由義字仲方號慎齋佩其先人之訓惟謹用克自樹立長娶范氏今封太

原郡夫人起家以文學掾辟中書戶部史辟宣徽掾
中書西曹掾授奉訓大夫禮部主事拜朝請大夫西
臺御史改徽政院都事復拜中臺御史遷中書右司
都事進刑部郎中官亞中大夫貳在京留鑰出牧彰
德尋轉嘉議大夫嘗語人曰先人贊畫一邑尚不希
世苟合今寔位通顯爲政何敢鹵莽在儀曹數年練
習典故禮祀科舉設施注措如指諸掌在徽政能抑
內侍節浮費在憲府屢有獻替從上上京抗章論衛
士縱牧畜躡民田不便由是行營無敢犯者在西曹
嘗議江西行省討鄰寇岑獠功時相媚嫉抑不以聞

奮與力爭相震怒殊不爲動廷論壯之在臬曹主四
方獄持法平允多平冤釋疑客每以是稱其能輒遜
謝曰先人之教也元既序其世次先德又爲之言曰
王君由義眞賢者也居寵不忘其先而能圖報攸久
孝之純也君仁如天旣獲所願常情得之矜詡恐後
乃獨周思審慮三歲而後訖其事焉敬之至也雖然
爲子止孝爲臣止敬誰實成其美哉大君之仁也顧
願王氏子孫世世服膺斯言以無忘吾君之惠則孝
敬之餘澤縣百世而未艾實自茲始也銘曰王氏居
秦世歷七葉惟德惟義是其負挾積善獲報假物責

償矧濟厥流其源日長受命錫誅歲律三易奉盈執
玉爲是踧踏古鼎有銘今碑所祖三命益恭曰偃僂
俯惟恭不啻獲福鬼神繫正考父我思其人至正元
年歲次辛巳四月吉日建子山尺牘云巉巉再拜奉
記仲方總管相公閣下賤體一病正六十日四月廿
二日後得出尙未十分如故而步履猶爾蹇走所以
兩勞車從見訪不獲奉見想必體恕之耳五月初當
往上都雖倉卒閒得畢此碑然中間頗自以爲得意
若使一能手刻石不顧少費則佳如其否者必不得
如意也草草具數字不盡

南有唐嚴譔墓墓旁卽譔祠

墓在王由義墓東南二里許祠創建未詳明文淵閣

大學士同州馬文莊公

自強

有嚴氏祠堂小記於嚴

公無所表章王河汀

學謨

有重修嚴公祠記謂天順

中通政蕭公斌白於知縣申公閏名曰重建維時護

作爲邑子陳王輩實成化之丙申春也偕事則少宗

伯能左布政使恭少監本僉事道主事讓太常博士

彥常知府惟敏知州清知縣儒理遜判官莊至嘉靖

乙卯地坂原崩祠圯萬歷乙己知縣馬公諷日工作

增以三楹飾以斧藻又言嚴公厚德不宜以占風角

事女主之故罷公祠鄉賢因嘆世俗見豪毛不見其
曉誠固於爲月旦而其識下於高叟遠矣

苦泉在縣西北四十五里以飲羊不羶

在鎌山之麓元和郡縣志所謂許原下也泉水飲羊
肥美唐時於泉側置羊牧通典所謂豐羊牧也高宗
永徽二年九月以同州苦泉牧地賜貧民卽此今日
雙泉以其側又有小泉也

南有唐同州刺史姜師度通靈陂陂故溉田百餘頃今
廢

唐武德元年改太守曰刺史加使持節上州刺史一

朝邑縣志注

卷一

總志四十

四

長春外史

人從三品職同牧尹姜師度魏州魏人擢明經調丹
陵尉龍岡令有清白稱神龍初試爲益州刺史河北
道巡察兼支度營田使好興作始廝溝於薊門以限
奚契丹循魏武帝故迹並海鑿平鹵渠以通餉路罷
海運省功多遷司農卿出爲陝州刺史太原倉水陸
運所湊轉屬諸河師度使依高爲厓而注米于舟以
故人不勞拜太子詹事元宗徙營州治柳城拜營田
支度修渠使進爲河中尹安邑鹽池涸廢師度大發
卒洫引其流置鹽屯公利收利不貲徙同州刺史又
派洛灌朝邑河西二縣闕河以灌通靈陂收棄地二

千頃爲上田置十餘屯帝幸長春宮嘉其功下詔褒美加金紫光祿大夫賜帛三百匹進將作大匠卒年七十餘師度喜渠漕所至繇役紛紜不能皆便然所就必爲後世利今縣西北十五里通潤邨是陂故址水落陂見百字疑誤

又南有元戈平章甘社寨

元中統至元間分立行中書省凡錢糧兵甲屯種漕運軍國重事無不領之每省平章二員從一品陝西行中書省治京兆戈平章未詳甘今書作干戈之干寨去縣三十五里在通靈陂東北二十里志作又南

朝邑縣志注

卷一

總志四十一

望

長春外史

恐譌

金水河在苦泉東北五里自邠陽縣來舊嘗引水灌田今廢

金水河出邠陽縣北梁山下逕邠陽縣南卽詩在洽之陽之洽水東流經縣北洿浴堡入于河宋史五行志咸平四年七月同州洿谷水溢夏陽縣溺死者數十人卽此金水但水才如衣帶而兩岸高幾百丈朝邠往來以此不可以車

北爲夏陽卽韓信木罌渡處

夏陽秦縣故少梁秦惠文王十一年更名漢屬左馮

翊地在今邵陽之南有漢水木罌漢書作木罌缶瓶
之大腹小口者木罌缶渡軍謂以木桺縛罌缶以度
也漢王二年以信爲左丞相擊魏魏盛兵蒲坂塞臨
晉信益爲疑兵陳船欲渡臨晉而伏兵從夏陽以木
罌缶渡兵襲安邑虜豹定河東

風俗第二

語曰至治之極國無殊俗今天子神靈海內一統烏有所謂異俗者哉然閭閻趨向節序往來嬉戲之間則有與他處異者秦民皆力農朝邑頗事賈

縣北都仁鄉地雖墮墮然有田可種人猶得事力耕自餘鹼灘沙苑鹽池窰俱屬不毛近日河洛渭三水歲溢而善崩崩則田没于河溢乃田悉變沙猶之不毛故人多服商賈耕者作苦商者背井又或負擔輦重不辭勞焉然惟正之供不事鞭朴貧而知恥大較然也

朝邑縣志注

卷一

風俗一

三

長春外史

婚姻論財

不聞貧富男用重幣女用厚簪一娶之費不下千金賓客雜選略無儀節壻婦合蓋粗儉無禮於今爲甚仕者尙廉有氣前輩盡然今少衰焉

謂蔚能楊珪張珣周瑄雷爵王朝雍周道等王河汀

學謨

說今鄉里以財相尙忘本趨末車馬衣服翩翩

都雅及閒與之談詩書稱說禮義咸扞格不能相通嗚呼惜哉富而須教是有望於今之掌風化者

元日樹紙竿接天神以麻縛木炭置門上云吉利二日壻往拜婦家

樹竿縛炭鄉邨猶然城內則否豈所謂禮失而求諸野者邪

五日以故綵紙爲婦人戊夜乃出婦人送窮

今謂之五窮日不得舉女紅禁灑掃晝有朝禺中晡夕夜有甲乙丙丁戊戌夜夜盡將曉也

二十三日置煎餅屋上補天是日仍不得食米

今二十日名天穿日煎餅以麩爲之米粥也縣人日食之物是日以米作粉打稀糊雜蔬腐煮豆寒具飲之不齧粥也元宵前後三日亦然

清明婦女盡出遊觀三日乃已不得舉女工云卽舉之

朝邑縣志注

卷一

風俗二

器

長春外史

且盲

遊日頗多清明爲甚方書有青盲眼故忌清明尤甚

四月四日男女戴皂角葉已頭痛

今四月一日不知改自何時

五月五日六月六日七月七日九月九日迎女之已嫁者

今則五日送糴七日送瓜九日送糕改迎爲送不知

起于何時六日女之已嫁者來以清茶拜灌于父母

墓上曰點湯父母在則否

臘月五日食五色煮豆豆者毒也食之已五毒

冬至後三戌臘祭秦曰嘉平今建丑之月也五豆近
日用黃豆白豆青豆赤豆綠豆加紅棗煮食之留有
餘至八日於臘八粥中用之

物產第三

朝邑無他奇產產獨服食他處俱有者不載載其美者多者果則瓜桃梨棗菜則蔥蒜藥則麻黃甘遂香附枸杞魚則魴鯉畜則羊服則木絲絲絲出南陽洪者斷則易續引之則長

西瓜出西王寨者大而脆美桃出北陽洪南陽洪梨出王謙無粗能久藏棗柳邨者勝沙苑蔥蒜出南馬邨沙底麻黃出鐵鎌山甘遂香附出沙苑枸杞不概見今各處生者刺多而實細味劣不中入藥魴卽鯉之赤尾者河出羊黃羊也大尾鬣耳無角有重百斤

朝邑縣志注

卷一

物產一

吳

長春外史

者食之不羶木棉今之草絲也縣有三種一曰絲絲出於蠶緝一曰木絲出於嶺南交廣名班枝花唐李商隱詩木絲花發鷓鴣飛是也樹大盈抱花紅似山茶而紫黃花片極厚不中紡一曰草絲土人多執之以穀雨前後下種既生一月三罍春生黃花夏結實至秋實熟四裂綻出如絲亦有淡紫色者名紫花以鐵鋌輟去其核取如絲者用木爲大弓張皮弦以木槌彈之令其勻細卷爲筒就車紡之自然摺緒如縲絲狀可以爲縲可以織布草絲古或謂之木棉通鑑梁武帝木棉皂帳史照釋文說同草絲但絲字不宜

從木蓋質用似絲故以絲名之後人遂造此棉字耳
絲惟南陽洪沙苑有之他處且無桑樹絲焉從出興
平楊雙山 山 謂余曰關中沃野顧人不知樹桑養蠶
誠養之利且數倍於耕使家家有蠶則人人可以挾
纊烏呼安得有力者倡此美舉哉王河汀 學漢 曰物
不問奇珍惟在奉生需用千樹杏萬樹桃桑棗無慮
以億計蔥茄干畦菜菔瓜田百畝夏秋之交肩任背
負襁屬輻輳達於四境交易而退得穀百鍾因之衣
食滋殖語云一畝園十畝田非虛言也王謙饒於梨
沙底美蔥蒜瓜最甘泊里韭南陽北陽多桃李濱洛
朝邑縣志注

卷一 物產二

七

長春外史

孺而上桃花三十里不絕此其人各任其能畢其力
不待督責而競勸植果倍於樹穀任地之宜因天之
時上輸租稅下而富家邑之地不足而猶不至大徙
者恃此具也

田賦第四

朝邑土田凡二萬四千一百四十九頃三十四畝

嘉靖閒減一萬七千一百五十六頃二十四畝有零
隆慶閒減一萬四千一百三十一頃八十七畝有零
萬歷閒減一萬四千二十九頃六十一畝有零順治
初減一萬五千四百九十五頃二畝有奇乾隆三十
九年減一萬七千三百一十六頃五十二畝有零今
計土田六千八百三十二頃八十一畝一分有零
戶今一萬二千九十八戶軍二千三百八十七戶匠三
百六戶雜役一百七十八戶餘俱民戶焉口凡六萬二
千六百二十七口

朝邑縣志注

卷一 田賦一

吳

長春外史

今戶三萬五千九百九十七視萬歷時增戶二萬三
千七十八視嘉靖及五泉先生時增戶二萬三千八
百九十九今口二十萬九千六百七十四視康熙年
增口十一萬六千四百六十四視萬歷年增口十四
萬五千一百三十四視嘉靖年及五泉先生時增口
十四萬七千四十七土田日減戶口日增朝之人能
無坐困乎

秋夏稅凡二萬七千五百石有奇

稅多於嘉靖中五千七百五十九石五斗有奇多於

康熙中七千八百九十四石有奇多於今九千三百一十八石四斗有奇

草七千三百六十束有奇木絲三千八十三斤絲絲六斤有奇布九千七百三十三疋絹一百八十二疋此其以田賦者

今雜項俱無田賦共科料一萬八千一百八十一石五斗一升有奇折徵銀二萬四千一百一十九兩二錢二分有奇

其以丁賦者又有鹽鈔十有七萬六千八百四十貫貫準銀三釐黃丹二千斤斤準銀七分絲羯羊二十隻隻一十六兩有奇又有石青大材木炸塊木柴黃熟銅山羊皮諸雜歲調多寡不同而力差不與焉

鹽鈔以下與總數不合

宏治以前丁賦力差供歲足則止不派故能以三十六里更用而迭休之以後乃通取焉所以然者以用聽差者聽差者差已足無差而聽差也聽差者官盡收銀而貯之庫上戶丁九錢至七錢中戶丁六錢至四錢下戶丁三錢至一錢畸零者丁一錢于是無空民矣

宏治明孝宗年號順治時徵丁銀七千七百八十九

兩五錢八分零康熙五十一年徵丁銀七千三百四十六兩五錢五分零今徵均丁銀八千七百六十三兩七錢八分零地丁共徵銀三萬二千八百八十三兩零自均丁以來無地者無丁而人始以田爲累矣張我華曰王河汀學謨有言漢人謂民有七死今之書算無乃其八與謂以告災爲姦計指均糧爲利藪也蓋鄉人不知稅糧總數故派者恣意妄加卽豪宗聞其利自百以其奇羨賄放小戶且其人無立錐之土而詭爭輕則輕則旣得而姦計滋生矣然則今之關差運費殆所謂九死而無一生者乎夫潼關當全

朝邑縣志注

卷一 田賦三

辛


長春外史

陝咽喉孔道其川滇甘涼新疆旌節往來與夫西域數十國朝貢絡繹旁午而關爲迎送首衝乃其所治東不出閭門西才及城闌北限於大河三方所轄二里而近迤南又皆崇山複嶺地固無所事乎車馬人亦以衝故畏累絕不畜牧勢不得不取給於縣縣又屬視關官關牒朝至車馬夕已駸駸道周矣且車馬名出里下實則顧之輿夫輿夫姦黠先已囑之兵書里胥價昂數倍到關則又有馬疲車破種種吹毛之誅求其究也浹旬累日始獲一膺差事而歸一日之費多逾百金少亦不下數十金更有虛信張皇不見

差事而返者其運費已盈千累百如此者歲不下十數次於是運頭浮取之里長里長橫索之什排什排錄計錙算而人始不勝其累矣夫縣東諸聚落若大慶關往以河淤田肥美人殷富然且無今日運費差派之苦慨自乾隆三十三年以來河災頻仍常時衆庶不免稱貸再值四十六五十年河溢壞我聚落潰我冢塋齟齬莽莽相望於野號哭遍於東郊此猶一時之痛楚幸而河退則田悉變沙如山如阜高窳不定才一播種大風飛沙不苗不秀虛費籽力折而東北沙爲板沙訖不可耕是以河壩之家鄉也積有

宛財今則菽豆不贍始而履絲曳縞今則衣敝穿孔矣縣北諸鄉地盡高原可幸無虞而田半墟土趨澤乃孰閒者數年比不登當具有者半價而賣亡者取倍稱之息枵腹仰屋者比比矣又何堪此關差運費之重累也是必至富者求貧貧者求徒不如是不能已也此非過爲喋喋膚受之愬實以痛蚌在身耳目痼瘕敢告後之仁人君子酌盈濟虛撫摩燠休無使頻於八死九死而拊躋之蓋不啻生死而懸解之也





朝邑縣志注

地 170.45
274.1
部



地 152.43
274

朝邑縣志注卷二

五泉山人韓邦靖汝慶父撰

長春外史張我華元觀父注

名宦第五

朝邑幅員不及二百里

縣南北九十五里東西五十里環境不足三百里者
十里二百疑應作三百

東有鹹灘

鹹讀若減鹽生之名今人作鹹鹼鹵之凝箸味最下
者灘自縣東北小伏坡厓下南至長春官厓下東屬

朝邑縣志注

卷二

名宦一

一

長春外史

於河

西有鹽地凹

西自大荔縣來東過上下秦大平通潤諸邨以及於
小伏坡邨西蓋卽古所謂通靈陂者凹宜作窰汚袤
下也土人讀去聲

南有沙苑皆不可耕可耕者纔十分之二三耳而又界
河渭漆沮三水者歲溢而善崩溢輒沒禾稼崩乃數十
年不得田

沙苑見上總志注善崩言憲崩也

以故朝邑民獨貧少生業夫其和來安養獨在縣官耳



縣官治績顯者洪武中則有縣丞卞禮宏建百規開先來者

縣官明制知縣一人正七品丞一人正八品主簿一人正九品其屬典史一人編戶不及二十里者丞簿並裁禮後萬歷十年丞裁

成化中則有知縣李英然英善修舉喜用民當其時聲名籍甚去之日民莫能思也宏治中則有知縣蘇槃廉謹不擾庶幾良吏近時則有知縣衛傑菲惡自持取與峻潔他無錄焉若夫元氏以往其或治績莫考而名氏猶存苟非閩人碩士必其遺愛不忘用並書之以垂不朽而教諭翟方附焉

朝邑縣志注

卷二

名宦二

二

長春外史

明洪武二年天下縣置儒學教諭一人未入流英槃傑方皆祠名宦

晉歐陽建字堅石渤海人爲朝邑尹

建世爲冀方右族雅有理思才藻美瞻擅名北州時人爲之語曰渤海赫赫歐陽堅石辟公府歷山陽令尚書郎馮翊太守甚得時譽建石崇外甥與趙王倫有隙及孫秀求崇妓綠珠不得乃勸倫誅建崇建崇亦陰勸淮南王允齊王冏以圖倫秀秀遂矯詔收崇建建遇禍年三十餘臨命作詩文甚哀楚晉時縣不

名朝邑亦未嘗置尹蓋晉時縣爲馮翊郡治建曾爲郡太守或以此譌與

唐劉幽求冀州武強人爲朝邑尉

幽求聖歷中舉制科中第調閩中尉刺史不禮棄官去久之授朝邑尉臨淄王入誅韋庶人預參大策是夜號令詔勅一出其手以功授中書舍人參知機務爵中山縣男睿宗立進尚書右丞徐國公景雲二年以戶部尚書罷政事不旬月遷吏部拜侍中加賜實封二百戶並前封共九百戶子子孫孫傳國無絕特免十死銘諸鐵券以傳其功先天元年爲尚書右僕

朝邑縣志注

卷二 名宦三

三

長春外史

射同中書門下三品監修國史中書令崔湜等附太平公主有逆計幽求與右羽林將軍張暉定計使暉說元宗請督羽林兵除之未發事漏睿宗以幽求等屬吏劾奏以疏閒親罪應死元宗密申右之乃流幽求於封州暉於峰州明年大平公主誅即日召復舊官知軍國事還封戶賜繡衣一襲開元初進尚書左丞相兼黃門監俄以太子少保罷姚崇素忌之奏幽求鬱快散職有怨言詔有司籥治宰相盧懷慎等奏言幽求輕肆不恭失大臣體乖崖分之節翌日眨睦州刺史削實封戶六百遷杭柳二州恚憤卒于道年

六十一贈禮部尚書諡曰文獻六年詔與蘇瓌配享
睿宗廟廷建中中追贈司徒我華按幽求卒于道今
縣東北洿浴堡乃有幽求冢王河汀學漢疑冢爲後
漢孔僖墓又云本義冢迄無定說余聞長老言往河
崩洿浴岸圯並壞冢中有石柱四結以鐵鎖如杲恩
狀鎖上大棺一具丹漆如新有好事者啓視惟兜鍪
金甲旁一短柄金瓜別無他物蓋葬衣冠處惜不能
確知爲劉公否然至今冢旁有掘土者居人輒不安
時人神異之唐武德元年改書佐曰縣尉尋改曰正
七年改縣正復曰尉上縣尉二人從九品上

朝邑縣志注

卷二

名宦四

四

長春外史

季邠

闕

爲朝邑尉

邠下闕數字季邠唐書無考王河汀

學漢

作李邠云

宗人雍王之後爲朝邑員外尉雍王李繪太祖第五
子於高祖爲從父仕隋江夏總管八世有邠九世有
邠然宗室表邠官陝府左司馬邠官澄城主簿俱未
尉朝邑然二先生所書必非無據非淺學所能知
畢縣令名次莫考

唐志上縣令一人從六品上畢河南人乾寧四年爲
朝邑令會同州軍叛亂絜其妻竇氏竄望仙里旣夕
盜作仇家乘亂摔令首必死之令妻以身蔽捍被重

傷猶不置令竊隙逃匿而免里人列狀於府齎之酒帛司空圖爲作竇列婦傳然則畢本聞亂棄城添於守土之義者固無足錄獨以妻竇捍難忘身瀕死不撓可以愧天下之爲丈夫而愴卒失守者

元成好德顏英俱朝邑知縣

好德增修廟學英重葺縣治元制縣皆置尹此曰知縣未詳

大明卞禮闕洪武中爲朝邑縣丞

禮下原闕三字

李英河南祥符縣人成化中爲朝邑知縣陞去

朝邑縣志注

卷二

名宦五

五

長春外史

英以舉人成化十七年至館舍壇鋪多所繕治

蘇槃河南南陽縣人宏治中爲朝邑知縣罷去

槃字德新以舉人宏治六年任厚學子月給燈油資夜誦一日漏下偕門童步橫舍稽勤惰適遇學人羣而角戲不意卒至槃親執其兩人譙讓久之乃去出學門聞書聲喜曰小生不當如是邪吾行學不見一人攻苦獨有此幼學耳詰旦給燈油於是諸生媿感焉居九年以大計去公論惜之其來也爲對一聯以見志曰牢立脚跟要做一場循吏緊縛肚皮甘爲百歲窮人其廉謹可知矣

衛傑山西夏縣人正德五年爲朝邑知縣致仕去

聞之長老云傑以舉人任行縣不攜里長以市餅自給渴則飲於途它日有婦人汲水過青衣酌而飲之雖無威儀然所謂非惡自持取與峻潔非溢美矣

翟方山西榆次縣人成化中任儒學教諭善教朝邑科目成化中獨盛甲午科舉六人庚子科舉五人

方由舉人任六人郭鼎張磬韓紹宗劉永張珣梁文盛五人李貞蕭鵬周瑄仇昉李夔

人物第六

賢人長者懿德美行湮沒多矣豈不惜哉

新市鎮有張氏者其先元功臣張柔之後也柔以功封安肅公加封汝南王諡忠武柔子宏政宏範範子

珪今皆有象

我華

猶及見之柔象不書銜宏政象書

都總管宏範象書銀青榮祿大夫平章政事漢軍都元帥封淮陽王珪象書銀青榮祿大夫平章政事蔡國公柔宏範珪功勳見元史列傳而志未及錄不寧惟此繼美如漢之嚴翰林清德如隋之鉗耳文徹世爵如北朝嚴稚玉協司業至唐不替孝友如嚴士良

朝邑縣志注

卷二

人物一

七

長春外史

忽麒忠義如別修誅討祿山善吏如郭均王楫樊資箸績元世勤能如侍郎王良廣愛如張九成上義如寇福輸粟千石濟饑李珩劉十九輸粟五百石咸邀旌表建坊立石奇遇如席彥才者以老人進香文皇奇其狀貌且善應對授行在戶部主事滿考稱典幹予承德郎若夫程編修濟妻之智烈子廉之奇技不愧爲編修之妻若子矣其他或名存跡沒或本無足紀而散見於史傳集錄不知凡幾若數子者誠不啻一鄉之善士而志且逸之惜哉之歎蓋傷文獻之不足書闕有閒也

蓋宏治中沮水齧趙氏墓墓崩有石曰皇慶二年旌表孝子趙良

皇慶元仁宗年號二年歲在癸丑

漢籍少公嘗脫郭解于厄吏人踪跡至少公少公乃自殺以滅口

解軹人也字翁伯善相人者許負外孫也解爲人短小精悍不飲酒少時陰賊慨不快意身所殺甚衆以軀借交報仇藏命作姦剽攻不休及鑄錢掘冢固不可勝數適有天幸窘急常得脫若遇赦及解年長更折節爲儉以德報怨厚施而薄望然其自喜爲俠益甚及徙豪富茂陵也解家貧不中訾吏恐不敢不徙衛將軍爲言郭解家貧不中徙上曰布衣權至使將軍爲言此其家不貧解家遂徙諸公送者出千餘萬軹人楊季主子爲縣掾舉徙解解兄子斷楊掾頭已又殺楊季主楊季主家上書人又殺之闕下上聞乃下吏捕解解亡置其母家室下陽身至臨晉臨晉籍少公素不知解解冒因求出關籍少公已出解解轉入太原所過輒告主人家吏逐之迹至籍少公少公自殺口絕

嚴譏唐則天時爲詳審使活死囚八百餘人罷疑獄百

人又原不實者千餘姓譔善風角繼李淳風爲太史令
占熒惑入與鬼及諸張敗及諸陵墓事俱驗譔子向爲
鳳翔尹有政聲

詳審使無常員風角占四方之風以知事也李淳風
岐州雍人明步天歷算著法家書七篇上之累官太
史丞遷爲令譔麟德歷唐太史監或改局或改秘書
閣渾天監渾儀監改復不常令或改郎中或改監或
復爲令唐志鳳翔府尹一人從三品嚴善思名譔同
州朝邑人以字行父延與河東裴元證隴西李真蔡
靜皆通儒術該曉圖讖善思傳延業褚遂良上官儀

朝邑縣志注

卷二

人物三

九

長春外史

等奇其能高宗封泰山舉銷聲幽薨科及第調襄陽
尉居親喪廬墓因隱居十年武后時擢監察御史兼
右拾遺內供奉數言天下事方酷吏構大獄以善思
爲詳審使平活八百餘人原千餘姓長壽中按囚司
刑寺罷疑不實者百人來俊臣等疾之誣以罪譴交
趾五歲得還是時李淳風死候家皆不效乃詔善思
以箸作佐郎兼太史令聖歷二年熒惑入與鬼后問
其占對曰大臣當之是年王及善卒長安中熒惑入
月鎮星犯天關善思曰法當亂臣伏罪而有下謀上
之象歲餘張柬之等起兵誅二張遷給事中后崩將

合葬乾陵善思言合葬非古漢世皇后別起陵墓魏
晉始合葬漢積祀四百魏晉祚率不長亦其驗也今
若更擇吉地附近乾陵取從葬之義使神有知無所
不通若其無知合亦何益中宗不納神龍中遷禮部
侍郎表皇后擅政爲社稷憂求汝州刺史嘗語姚崇
曰韋氏禍且塗地相王所居有華蓋紫氣必位九五
公善護之及睿宗立崇以語聞召拜右散騎常侍初
譙王重福徙均州過汝善思爲刺史及謀反僞除禮
部尙書重福敗坐關通論死吏部尙書宋璟戶部郎
中李邕薄其罪給事中韓思復固請乃流靜州始善

思爲御史中書舍人劉允濟爲酷吏所陷且死善思
力訟其寃得免戶部尙書王立本見之曰祁奚之救
叔向嚴公有之後見允濟語未嘗及之思復之解善
思也亦不自德時稱長者之報後遇赦還開元十六
年卒子向乾元中爲鳳翔尹三世皆年八十五云
申屠思恭呂昂郭觚張元亮唐書云事親居喪箸異行
者

新唐書孝友序傳自萬年王世貴以下第八縣有朝
邑申屠思恭呂昂無郭觚張元亮名呂昂下卽曰鶻
觚張元亮靈臺孫智和始悟五泉先生所見本譌鶻

爲郭遂以縣名爲人姓名並收張元亮于縣也再考唐書地理志無鶉觚縣由天寶元年改鶉觚爲靈臺也然則元亮開元以前人故繫之鶉觚智和天寶以後人故繫之靈臺無可疑者異行唐書作孝行唐書爲是

元趙良孝子

元史孝友列傳其居喪廬墓者則有同州趙良

王亨爲縣幕官亨孫由義至禮部侍郎歐陽元王氏世德序曰亨爲縣幕官持守端楷每與時尙同異遂棄去不仕由義爲徽政院都事能抑內侍節浮費爲御史累朝邑縣志注

卷二 人物五

士

長春外史

有獻普從幸上京抗章論衛士縱牧踐民田行營無敢犯者又與時相爭江西行省戰功至相震怒不爲動元縣置典史二員當時謂之幕官元志禮部侍郎二員正四品歐陽元字原功瀏陽人延祐二年賜進士出身授岳州路平江州同知調蕪湖尹改武岡召爲國子博士陞監丞遷翰林待制兼國史院編修官天歷二年授藝文少監纂修經世大典陞太監元統元年拜翰林直學士修四朝實錄兼國子祭酒陞侍讀學士修遼金宋三史爲總裁官至正五年拜翰林學士承旨進階光祿大夫十七年卒年八十五贈楚國

公謚曰文元三任成均兩爲祭酒六入翰林三拜承旨修實錄大典三史屢主文衡兩知貢舉及讀卷官凡宗廟朝廷雄文大冊多出元手海內名山大川釋老之宮王公貴人墓隧之碑得元文辭以爲榮有圭齋文集若干卷行世同異碑作異同徽政院先爲詹事院本東宮官至元三十一年改爲徽政院此後罷設不常至天歷二年改爲儲政院然無都事其屬章慶使司有都事二員而不言所掌至大三年立至治三年罷上京卽上都今承德府由義元史無傳行事詳總志王由義墓注

朝邑縣志注

卷二

人物六

三

長春外史

大明高翔程濟楊景學馬仲昌洪武中俱以明經徵洪武中嘗論禮部經明行修練達時務之士徵至京師以翰林六部及布按兩司用之

翔有文學節行爲監察御史高皇帝甚眷注翔翔所論奏無不關國家機事當上心者革除閒文皇帝素聞翔名翔將大用之會翔服喪服入見語又忤旨乃殺翔族其家沒入其產諸給高氏產者皆倍其稅曰以世世怒罵御史也御史親戚皆配爲軍

明史職官志都察院十三道監察御史一百十人正七品翔明史附胡閏傳續藏書曰文皇族翔又發翔

先墓雜犬馬骨焚灰揚之而以其地爲漏澤園嘉靖三年知縣邵公相建高先生祠堂苑洛先生爲碑記曰先生姓高諱翔洪武中以明經拜監察御史靖難之師至江上先生遂革除之義云邦奇自爲兒童時往往聞父老稱說先生事感慕咨嗟輒泣下數行顧以文典未徵徒識於心未敢稱述會見侍御張君芹備遺錄載先生姓名官稱適五泉大夫韓邦靖爲朝邑志爰命次序先生事於書而先生之事始白於人矣當洪武時高皇帝甚眷注先生先生所奏事無不關國家幾事當上心者及革除文皇帝素聞先生

乃召先生欲用之先生以衰服見語又乏膚敏左右遂兵之嘉靖元年冬邵侯來尹吾邑樂節慕古咨詢文獻惟日孜孜邦奇乃以先生語侯侯曰嗟乎世俗之蔽也久矣計利者忘義謀家者負國孰有殺身成仁如先生者哉夫當革除時變通之士比之惟初受他吉者多矣而過涉滅頂先生乃蹈之夫褒死者所以勸生者起頑懦而激民風相之責也乃建祠肖象於五衢之地俾過者居者咸有式焉事竣乃屬邦奇爲文勒之石夫先生之沒至今百五十餘年而表樹之典始興於今日者豈前人好德之心或有間歟徒

以先生爲主之忠發於吠堯之節故論者往往以爲非時之宜耳昔者武王孟津之會順天應人夷齊乃叩馬而諫使當時非太公之言則夷齊亦刃下人也其後亦竟餓死於首陽之阿千百世之下武王不失爲聖夷齊不失爲賢然則祠先生者又何過焉練子寧方孝孺張鷟庵與先生同事者也子寧祠於江西孝孺祠於台州鷟庵祠於富平又永樂時有朝貴變姓名爲子寧諱者文皇聞之曰使子寧在朕固當用之於是乎見聖人之本心矣然則祠先生者又何過焉苑洛先生此記用典遣辭悉有權衡當時不得不

如此也碑邑生員趙瓘書瓘學平原書可謂登魯公之堂者此碑更端重峻潔有劔拔弩張之勢方之多寶塔碑不啻優孟衣冠真足以發高先生之氣張苑洛先生之軍矣不知何時碑折爲三且逸其下截其上二截在文廟忠孝祠廡下是年八月邑人請於華陰屈西溪直作郃公創建表忠祠碑記直五泉先生妻父舉進士終副都御史記專歸美郃侯能表章前烈及其歷官政事之績故不錄碑亦瓘書較前碑多收斂而道勁過之乾隆五十七年我華監修西河書院以前庭爲高程二先生享堂龕二碑及雷慕庵雙

忠祠記碑于堂壁我華有記紀其事

濟有法術爲四川岳池縣學教諭岳池去朝邑數千里濟寢食俱在朝邑而日治岳池學事不廢革除閒上書言某月某日西北方兵起朝廷以爲非所宜言繫至京召入將殺之濟叩頭曰陛下幸囚臣期而無兵臣死未晚也遂繫濟詔獄已而兵果起乃赦出濟更以爲軍師護諸將北行與靖難軍先鋒戰於徐州大捷會曹國公師退文皇帝至江上濟逃去不知所終始徐州捷時諸將乃樹碑載戰伐次第及統軍者姓名濟一日夜往祭碑人莫測其故後文皇帝過徐州望見碑顧左右曰碑朝邑縣志注

卷二 人物九

五

長春外史

者何也或以狀對上大怒趨左右椎碑一再擊遽曰止爲我錄碑來乃按碑族誅諸將無得脫者濟姓名正用擊處得免濟曩者之祭蓋禳之也

濟蔡家堡人後人改姓成今縣東諸成皆其後也岳池今屬順慶府徐州府今屬江蘇布政司曹國公李景隆也明史附濟於牛景先傳後續藏書曰建文旣赦濟以爲翰林編修充軍師護諸將北行及淮上諸將敗建文乃召濟還京師濟初與同邑人高翔並以明經徵翔厲名節濟好術數翔止濟勿爲此濟不聽已而有兵事濟又勸翔學我術翔曰我願爲忠臣也

金川門破翔召濟同死濟曰我願爲智士也翔竟死
建文急召濟入問計濟曰天數已定唯有出走免難
耳立召僧爲建文落髮濟從走每遇險濟輒以術脫
去相從數十年後隨建文至南京人尙識濟至京莫
知所終王河汀學謨曰濟子廉善槍文皇嘗稱成國
公槍法後知有廉召與成國校併於殿庭廉進退敏
妙成國弗能當也上心賞其能命爲錦衣衛千戶子
孫至今猶有存者又曰高公殺身成仁義不苟生程
公以術全君義不徒死均之爲社稷耳今高公有祠
宜與程公並祀乃見同道之義云萬歷十六年知縣
朝邑縣志注

卷二

人物十

六

長春外史

郭公實改表忠祠爲雙忠祠祀高程兩先生苑洛先
生外孫御史雷慕庵士禎記其事初濟妻某氏新歸
後舅姑相繼歿盡出衣裝管葬及夫教諭岳池以熒
惑守心將疏論之諫曰天道渺茫未可盡信君非司
天柰何越職言事夫卒言之逮繫氏隨至京金川門
破夫謂之曰我將顧君不能顧汝矣對曰勢不得已
計在一死不以爲君累夫旣入官遂以所繫縲縊死
楊景學縣丞

中曲里人布政使恭父江西撫州府金谿縣
馬仲昌大理寺左寺丞

沙底里人明志大理寺左寺丞一人正五品
李濟焚冕蕭斌劉讓上志韓家君名馬驥王香房瑄韓
邦奇韓邦靖牛斗王朝塗俱登進士

濟冕洪武二十九年舉人濟洪武三十年韓克忠榜
進士冕進士未詳斌正統九年舉人十年進士讓志
景泰四年舉人讓成化二年羅倫榜進士志天順元
年黎淳榜進士韓家君名五泉先生父紹宗也成化
十年舉人十四年曾彥榜進士驤成化十三年舉人
二十年李旻榜進士香成此七年舉人宏治三年錢
福榜進士瑄宏治二年舉人與香進士同年邦奇宏
朝邑縣志注

卷二

人物十一

七

長春外史

治十七年舉人正德三年呂柟榜進士邦靖宏治十
四年舉人與兄邦奇進士同年先是巡按在南門上
考取童生入大場謂之儒士能畢三場准予生員有
以儒士中式者五泉先生邦靖也不知何時停其法
然先生文止五藝又不知何時科場加嚴斗與邦奇
同舉鄉試正德九年唐臯榜進士朝塗正德十一年
舉人十二年舒芬榜進士

李濟官至左副都御史一統志云濟才敏學優歷官守
法

懷恩里人明志都察院左副都御史正三品

樊冕官至河南參政先爲都給事中吏部擬冕戶部侍郎英廟方嚮冕曰樊冕豈戶部邪可吏部侍郎無何英廟晏駕乃不果用

北石邨人明洪武九年置布政司左參政從二品十三年改從三品無員數分守各道洪武三年設六科各都給事中一人正七品戶部侍郎左右各一人正三品吏部侍郎左右各一人正三品英廟天順八年崩上距洪武二十九年共六十八年冕年且近百歲矣

蕭斌至通政管易州柴敞保定府志稱其廉謹自守

朝邑縣志注

卷二

人物十二

六

長春外史

喜慶里人洪武三年置察言司尋罷十年置通政使司有左右通政各一人正四品易州保定俱隸直隸布政司斌宅心公恕事不避難門無私謁王河汀

學

謨

曰初斌以嬰孺患痘疹死家人斂以小樽投之河榜人張某者數夢老父追呼救人覺而兒啼樽中自蕭氏至今官棄稷棄冰上生豈虛乎哉張我華曰今嚴伯蕭爾元秀才斌之孫也以財雄於鄉明德有後宜哉

劉讓至知府讓有氣先爲戶部主事監太倉與內侍爭席相惡乃謫東萊通判後爲永平府同知永平府志稱

其剛斷

親賢里人四川夔州府明初改諸路爲府設知府一人正四品同知正五品通判正六品同知通判俱無定員戶部十三清吏司各設主事一人正六品先是洪武中置軍儲倉永樂中置京倉及通州各倉以戶部司員經理之東萊宜作萊州府隸山東布政司永平府隸直隸布政司

韓家君名至福建按察司副使

明志提刑按察使司有副使正四品無定員

上志馬驥俱知縣

朝邑縣志注

卷二 人物十三

七

長春外史

志孚佑里人河南嵩縣驥懷恩里人山東汶上縣山東通志驥祠名宦中廉明方正人不敢干以私有所可爲不避當道竟以此去官人至今寃之王河汀學謨曰於乎當道者安在廉明方正驥之名不朽矣王喬至郎中侗儻任豪數有論奏

孚佑里人字汝器授戶部主事出掌錢穀於古北口觀潮河川難守乃上禦戎策敬皇不果行旣而請理京衛牧馬草場畜牧事宜當是時房山豪民侵收地喬檄涿州知州按驗知州不敢問謝去喬自按之且急豪民有奧援喬不顧曰法如是也除本部員外會

詔求直言疏列五十餘事尋陞本部郎中督儲遼東又條奏邊儲戰陣方略過山海關憲臣以誘殺勘邊士罪奪奏實非誘殺急行功賞以厲士心巡歷諸倉輒疏便宜七事會敵人塞又請選將添兵并薦其可任者數人兵部銜之論謫阿迷州同知南人馴服署蒙自縣歲侵不請先發以貸饑者擢知和州辯冤抑導水利和民戀之爲立生祠後爲蘇州府同知以直道迂時遂免歸明志戶部十三清吏司郎中各一人正五品

房瑄至按察使瑄先爲郎中上疏論時政時人稱焉今朝邑縣志注

卷二

人物十四

三

長春外史

家任邱

安仁里人明太祖吳元年置各道按察司設按察使一人正三品郎中刑部也刑部十三清吏司各郎中一人正五品任邱縣屬直隸河間府

韓邦奇至僉事韓邦靖至員外郎皆副使韓家君名子今俱以罪譴爲民

僉事浙江也員外郎工部都水司也按察司有僉事正五品無定員工部都水司員外郎一人從五品罪譴爲民正德十一年邦奇爲浙江按察司僉事奏罷富陽等縣魚鰾茶綾歲貢鎮守太監誣奏邦奇阻絕

進貢作歌誹謗逮赴詔獄詔奪爲民正德九年邦靖
爲工部員外郎因灾異上疏言頗切直天子震怒繫
錦衣獄科道論救乃奪官爲民也五泉先生傳已見
卷首自序後苑洛先生明史有傳然殊隘陋不足發
先生之休光我華今多方采輯叙箸於後焉邦奇字
汝節別號苑洛子朝邑洛苑鄉人副使紹宗次子五
泉先生之仲兄也少治尙書卽箸蔡傳發明禹貢詳
略宏治十七年以書舉第二人會試不第歸箸律呂
直解見志正德三年成進士授吏部考功司主事陞
員外郎六年考察都御史私袖小帙竊視邦奇曰考
朝邑縣志注

卷二

人物十五

三

長春外史

覈公事有公籍在何以私帙爲乃掣其帙封貯不檢
都御史爲遜謝同曹郎皆縮項失色尋調文選司尙
書托意爲官擇人欲發視缺封邦奇執不可曰發則
有私諸曹咸依阿邦奇執愈厲卒不更尙書銜之未
幾京師地震上疏極論時政闕失謫平陽府通判決
滯獄倡理學號一時卓異九年陞浙江按察司僉事
所蒞疏冤雪枉抑強扶弱除貪獎廉節財愛民而不
畏權要不憚險難它時浙無巡撫統攝故賦役獨稱
煩費邦奇釐爲四科事從節縮法嚴徵散公不廢供
私不厲民歲省以百萬計後來遵承命曰韓公科條

焉逆斲錢寧託寵義子以鈔三萬錠符浙省易銀當事者斂饋如其數邦奇檄知縣吉棠散其斂卒不饋宸濠將爲逆先命內豎假以飯僧聚千人於杭州天竺寺邦奇立爲散遣濠又以儀賓託名進貢假道衢州邦奇召儀賓而詰之曰進貢自當沿江而下奚自假道歸語爾王韓僉事在此不可誑也後濠果通謀鎮守欲襲浙江賴前事發姦不竟逞十一年鎮守太監王堂借魚茶進貢爪牙四出民不聊生邦奇乃作富陽民謠曰富陽江之魚富陽山之茶魚肥賣我子茶香破我家采茶婦捕魚夫官府拷掠無完膚昊天胡不仁此地亦何辜魚胡不生別縣茶胡不生別都富陽山何日摧富陽江何日枯山摧茶亦死江枯魚始無山難摧江難枯我民不可蘇四月乃以蘇民困以保地方事奏曰鎮守太監王堂市舶太監崔瑤織造太監晁進督造太監張玉各差參隨人等在於杭嚴二府地方催攢魚鰓茶綾等貢物固已勒要收頭銀兩而不才有司官吏及糧里人等倚是貢物無敢稽察任意科斂地方被害人不聊生而四太監伴貢之物動以萬計是陛下所得者一而太監卽所得者十參隨人等所得者百有司官吏所得者千糧里人

等所得者萬利歸於私家怨歸於朝廷上供者一而下取者萬況此等之物品不甚奇味不甚美何足以供陛下之用哉建富等縣地方地瘠民貧山枯乏樵獵之饒水清鮮魚鰕之利兼以近年以來水旱相仍徵科肆出軍民困瘁已極故前歲流民相聚爲亂一呼千百幾生大變幸賴無捕而安今尙洶洶未靖往事在鑑實可寒心伏望陛下勅下該部將前項貢物特從停止庶民困可蘇而地方可保無虞矣疏入免貢鎮守太監怨之乃誣邦奇擅革進貢作歌誹謗逮赴詔獄詔奪爲民旣歸謝客講學四方學士負笈從

遊者日衆乃箸周易集說以覺來學十六年世宗立詔起爲山東布政司參議十一月以聖母駕過山東高唐州同知金波供應有缺詔錦衣衛逮捕邦奇乃上疏略曰臣聞刑者人主治天下之大防而天下治忽所由係書稱堯舜之治至於四方風動其究歸於臯陶象刑之功故刑者人主之所當重慎而不可忽者也國家法古制刑內則總之三法司外則總之按察司其法詳且盡矣近者聖母駕過山東高唐州同知金波供應有缺陛下詔錦衣衛官校拏至京師天下譎然驚疑謂聖明在上亦復有此夫金波小官何

足以動天下之聽聞而錦衣官校出京拏人則固天下聽聞之所係也伏望陛下特宥金波之罪自後在外府州縣官有犯付之按察司三司官有犯付之撫按官撫按官有犯付之三法司如此則內外相承體統不紊罪皆閱實孰可逃刑哉先是金波見逮撫按三司皆認罪及見邦奇奏皆不悅遂自陳乞休嘉靖三年以薦起山西左參議是年大同兵變巡撫都御史張文錦遇害邦奇欲入大同城去二舍逆者使人露刃來迎且言城不可入狀是夜故燒參將宅以懾之邦奇單車入城時諸司無官邦奇獨任其事約

朝邑縣志注

卷二

人物十八

古

長春外史

法二條以戢暴亂幾兩月鎮城稍安十一月上遣胡侍郎提兵問罪邦奇爲之處分事宜翌日罪人斯得傳首軍門邦奇謂侍郎宜速給賞使城人畏威懷德弗聽遂復生他變矣四年再乞休歸七年起四川提學副使入爲右春坊右庶子兼翰林院修撰主順天鄉試命題迂當時權貴言者承風旨劾試錄繆誤謫南京大僕寺丞八年再疏乞歸起山東按察司副使遷大理寺丞進少卿以左僉都御史巡撫宣府至鎮謂戰馬倉糧皆邊務之首卽平市佑以易馬出紅腐以足軍時大同再變王師出討百凡軍需倚辦宣府

悉心經理有備無乏十四年入佐院事進右副都御史巡撫遼東時遼陽兵變侍郎黃宗明言邦奇素有威望請假以便宜速往定亂帝方事姑息不從命與山西巡撫任洛換官至山西旌循良黜貪暴定徭役平賦斂節驛傳禁和買憲度肅然巡歷邊塞增飭戰守之具拓老營堡城垣募軍常守以代分番而邊屹然可恃在官不煩有司供具閒日出奉米易肉一斤居四年引疾歸中外交薦二十三年以故官起督河道遷刑部右侍郎改吏部二十六年拜南京都察院右都御史進南京兵部尚書參贊機務既司留筦振朝邑縣志注

卷二

人物十九

三

長春外史

張我華曰先生外孫張士榮秀才先大夫副使公從
兄也歿先生誌其墓甚慟惜士榮子秀才可賢卽表
先生墓者與我先大夫提學公爲再從兄弟以故我
華知先生事頗詳先生著作甚富今板行者苑洛文
集二十二卷志樂十二卷正蒙拾遺一卷啓蒙意見
二卷洪範圖解一卷易占經緯四卷耳其易說二十
四卷書說二十卷毛詩未喻一卷編年事狀若干卷
板本不存先生墓在望嶽門外二里華原山頗據河
山之勝

牛斗今養親

朝邑縣志注

卷二

人物二十

三

長春外史

字應宿蔡家堡人以親老乞歸終養己乃除工部主
事嘉靖初陞兵部武選司郎中世宗詔革先朝冒濫
軍功傳陞帶俸武職無慮千數亡何冒濫者賄於當
軸乃於詔書中開黃綠之路兵部尙書力爲之地獨
難於斗而令司務廳喻意斗執不從尙書不得已名
斗於火房爲好言誘之曰此當國者意也吾與若爲
之柰何斗曰朝廷初詔號稱聖明未幾輒欲反汗其
何以示天下尙書曰彼柄政者欲之子但奉行何患
無美遷斗曰壤國紀而博好官某不爲也尙書爽而
斥之曰若老郎中也陞遠方郡守出張義門遑回而

泣者有矣斗曰老先生戀戀富貴一旦失位不免飲泣若斗本寒素罷官守窮固也何哭之爲尙書愈怒幾欲扑之而不得斗因移病不視事尙書令他代署先汰革者復職如故無何出斗知萊州府又與貴勢不合致其事而歸

王朝塗今依親

依親未詳朝塗登第三子字仲冕初授三河知縣三河閻銳故里先是知縣青衣小冒謁銳私第跽而獻贄朝塗獨不往會銳以禮來冠服及門又不肯屈銳滋不悅邑富人假銳勢影射差役貧者代辦朝塗清出之且按其罪銳大怒屬意當事欲罷朝塗官適銳私人從旁解之曰縣君廉銳怒稍釋得調鹿邑沈邱盜起所在蹂躪朝塗繕城治具盜至城下三日百計攻取而朝塗極力捍禦盜退而疾不可爲矣遷宿州知州未至卒

朝邑縣志注

卷二

人物二十一

三

長春外史

韓邦靖曰宏治中教諭西蜀李君志朝邑其稱家君曰登進士仕至福建按察司副使居官有爲執法平恕閩人思之成化中爲刑部郎中朝廷有大獄擇公正官籍之僉推公初往正定再往大同曲直允合上心宏治初元上疏論時政多所允俞云

李君名益四川叙州府宜賓縣舉人宏治十七年作
邑志志未見副使名紹宗字裕後號蓮峰朝邑洛苑
鄉南陽洪人也行事見本傳有四子長鄭州知州邦
彥次苑洛先生三五泉先生四固始縣丞邦翊

楊仲貞吳垣唐夔倫楊恭王翼趙整歸儒李睿王福馬
駿王剛楊茂王孜王恪安永周道張玘王禮翟溫王質
楊禮趙衡靳能陳善雷嚴周易韓倫楊珪趙鼐劉偉靳
時熙安才孟熊郭鼐張磬劉永張珣梁文盛雷爵李貞
蕭鵬周瑄李夔仇昉于章雷霓楊煥楊友党爵東陽韓
邦彥程範王朝雍雷子質孟垣樊得仁俱鄉試舉人

朝邑縣志注

卷二

人物二十二

三

長春外史

仲貞洪武十七年華按洪武六年停科舉法至是十
年復行填夔倫二十三年恭二十六年翼永樂三年
整儒俱六年睿九年福駿剛茂俱十五年孜恪安永
道俱十八年安永時年十五歲玘王禮溫俱二十一
年質宣德十年楊禮衡俱正統三年能九年善景泰
元年巖七年易天順三年倫珪鼐俱六年偉時熙才
俱成化四年熊七年鼐磬劉永珣文盛俱十年雷爵
十三年貞鵬瑄夔昉俱十六年章霓俱二十二年煥
宏治二年由同州學舉友党爵俱五年陽十一年邦
彥範朝雍俱正德二年子質五年垣得仁俱十一年

科名考宣德七年有安仁里王昺由同州學舉馬邑
教諭以無功積謫河泊所大使蓋明初教職以任內
舉士爲一功馬邑素乏科第昺坐謫景泰四年有賀
威張泰俱由西安府學舉正德二年有安仁里翟貞
吉字元善由同州學舉授招遠知縣以廉名上四人
雖舉不由縣學皆縣人也志闕載

楊仲貞楊禮張磬仇昉俱至教授磬淳潔業尙書進士
甚精

明洪武二年詔天下府立儒學置教授一人從九品
七年又置都司儒學教授一人教武臣子弟仲貞禮

朝邑縣志注

卷二

人物二十三

五

長春外史

俱中曲里人仲貞四川重慶府禮山東東昌府磬字
中和樂豐里人王河汀學謨曰磬茂才時督學伍公
福有風鑑謂磬雖得舉三十年寒官耳後磬歷束鹿
訓導萬泉教諭遼東都司教授如其所云昉永康里
人山西平陽府

吳墳府照磨

明志府有照磨所照磨一人從九品洪武十三年六
月罷二十七年復置墳平羅里人山西太原府

唐彛倫王翼歸儒楊茂王禮靳能韓倫安才郭鼐李夔
党爵俱知縣倫剛介有行鼐治曹縣曹縣志稱其吏人

畏服

夔倫江田里人揚州府泰州如臯縣翼長春里人王

河汀學謨曰澠池教諭知縣未詳儒永康里人兗州

府滕縣茂夕陽里人平陽府蒲州猗氏縣王河汀學

謨曰茂至福建道監察御史楔綽雖壞其半有足徵

先後志俱不詳御史逸者不少矣王禮魯坡里人四

川保寧府南部縣能沙底里人由馬邑教諭陞大同

府應州山陰縣能在馬邑馬邑學有門者某少俊而

貧能令同諸子學時其衣食後又攜至縣舍恩禮有

加後門者某舉進士官陝西參議爲能豎楔綽下鄉

朝邑縣志注

卷二

人物二十四

三

長春外史

躬自存問時能已歿延能室坐上坐參議匍匐下拜
扶掖使不得荅拜後陞巡撫都御史意孜孜厚卹不
厭倫溥濟里人順天府通州武清縣以剛介稱才防
於里人河南彰德府林縣龔孚祐里人山東兗州府
曹州曹縣曹州今爲府曹縣屬焉苑洛先生三廉吏
傳有盧氏知縣郭龔字國器不苟不吐威行惠施盧
氏有礦山吏其邑者多緣以爲利公一無所取人畏
而愛之豈後又爲曹縣與夔受春里人四川夔州府
開縣党爵干邨里人山西平陽府吉州鄉寧縣調曲
沃

楊恭至陝西左布政使宣皇帝時恭謁選吏部言事稱
旨卽日召見上以恭言事有才而見又容貌偉甚乃勅
吏部與恭左布政使部尙書言左布政不缺員缺獨陝
西恭不得往上曰朱買臣獨不爲會稽耶恭奚不可陝
西遂授恭恭頓首固辭上曰吾知若辭布政矣顧陝西
鄉里撓而法耳乃令恭得便宜治事而賜免死券十道
又以子剛爲錦衣指揮始恭行時入謝知縣知縣不爲
禮旣得選乃令從者不得言布政衣故破衣納憑券破
囊中置驢上騎往見知縣知縣不知恭已得布政又爲
陝西勞之曰楊進士甚勞苦所得何官邪恭曰比知縣
朝邑縣志注

卷二

人物二十五

三

長春外史

差大耳知縣素易恭聞恭言遂怒曰若言官大豈爲布
政邪縱布政將如朝邑知縣何恭笑曰安知非布政邪
且正能治朝邑耳乃徐徐出其囊中憑券乃陝西布政
也一縣人盡驚知縣卒得罪去

明洪武九年改諸行省爲承宣布政使司罷行省平
章左右丞等官改參知政事爲布政使尋增設左右
布政使各一人秩從二品宣德三年定爲十三布政
司恭縣丞景學子蓉塘集云永樂二年以刑科都給
事楊恭爲陝西布政使王河汀

學謨

云靖難師起朝

議命曹國公統師問罪時恭爲都給事疏言宜先遣

使講和忤旨黜爲蒙自縣幕文廟卽位喜恭主和議
徵至除陝西布政居九年以廉貞終二說與志互有
不同然五泉先生必非無據也

趙整至監察御史

樂豐里人河南道

周道至僉事道中式時驛歸將渡渭一婦人從後呼之
婦人曰君騎卒妾子也妾寡居待此子以生念其當渡
渭故追視之耳道惻然舍騎步歸後爲御史征雲南夷
總兵官餽貨寶幾千金道却之又爲山西僉事有惠政
卒于官喪出民遮道哭奠三日不得行

朝邑縣志注

卷二

人物二十六

三

長春外史

受春里人授山西洪洞縣訓導陞助教擢御史至山
西僉事苑洛先生周氏世濟清忠傳有按察司僉事
道通政或從子明志征南將軍鎮守雲南總兵官一
人駐雲南府率以公侯伯都督充之

李睿不仕

長春里人王河汀

學謨

稱其高尚

王孜翟溫俱衛經歷

明京外各衛其屬經歷司經歷各一人從七品孜懷
恩里人羽林衛溫安仁里人騰驤左衛

王恪都司斷事

安仁里人河南都司明洪武八年改各都衛爲都指揮使司其屬斷事司斷事一人正六品副斷事一人正七品

王質趙鼎雷巖楊友俱教諭

質平羅里人山西沁州武鄉縣鼎江田里人河南南陽府泌陽縣訓導轉山西澤州高平縣巖防於里人縣未詳友溥濟里人四川成都府新繁縣

趙衡陳善劉永俱訓導

衡長春里人四川成都府漢州善太奇里人山西遼州劉永防於里人山西太原府平定州樂平縣明洪

朝邑縣志注

卷二

人物二十七

三

長春外史

武中制儒學訓導府都轉運司各四人州三人縣都司行都司衛各二人位雜職上

楊珪至太僕寺丞珪喜修廉隅飾儀度上退不干教授禮子

明洪武三十年置北平行太僕寺永樂十八年以行太僕寺爲太僕寺有寺丞四人正六品正定府志稱珪知獲鹿時吏治廢弛珪銳意振作凡城郭臺池衛舍橋梁之類完舊增新規制咸備每於政暇召諸生講論經史考第課業孳孳不倦鹿之科目文物由此漸盛王河汀

學謨

曰珪初爲獲鹿知縣以廉謹稱居

三載被徵或曰盍飾儀容中科道選珪局局曰吾非不知羞而不爲也竟以二毛補太僕寺丞以憂歸服闋當逆瑾用事乃不宥起家諸里戚彊起之終不聽瑾敗濡足者多不免珪號知機杜門謝客清操益箸號清楊子孫貧婁廉吏可爲而不可爲珪有焉劉偉至知府以厚德稱先爲文水文水刁悍劇縣偉不嚴而治

文水縣隸山西太原府偉中曲里人將往文水部使者封杖與偉曰以此齊梗化者偉藏杖不用獨以誠心直道爲理久之衆庶傾心向化偉歎曰孰謂文水刁悍政恐人不宥作好官耳入爲御史出知山東兗州府卒於官

梁文盛蕭鵬至知州

明天下州置知州一人從五品文盛沙底里人由河南延津知縣陞山東莒州延津志稱文盛識見精明才幹克濟鵬字萬里江田里人新寧知縣四川瀘州四川通志云鵬知新寧刑清訟簡多箸愛民之政雷爵張珣至府同知李貞周瑄雷寬于章俱至通判爵珣俱純篤廉謹至老不渝珣先爲通判時吏部舉天下廉有司二十人珣與焉時人榮之

雷爵防於里人苑洛先生三廉吏傳有大名府同知雷公爵字廷臣鄉試中式授保定府清苑知縣歷九年菲食惡衣常祿外無分豪取遷淮安府邳州知州又九年遷四川烏撒軍民府同知三年守制歸起復赴部時少師大學士邃庵楊公爲尙書見公名曰子清苑知縣邳州知州雷爵乎公曰是也楊公歎曰我爲外臺時過清苑者二過邳州者三歷歷聞于名今老矣大名天下名郡授子爲暮年優游之地公出笑曰大名養濟院邪我七十年孀居嫠婦今再醮乎至大名每行縣蕭然疋馬米疏自隨至南樂知縣鄉人朝邑縣志注

卷二

人物二十九

三

長春外史

陞南直隸淮安府通判中牟志稱寬行事忠厚章喜慶里人四川成都府

楊煥韓邦彥今任知縣邦彥副使韓家君名子

煥西莊里人山西太原府陽曲縣邦彥苑洛先生三廉吏傳有鄭州知州韓邦彥字汝哲授儀封知縣儀封稱治守制歸起復授高陽以奏薦調河閒時方議行取有尼之者曰知縣簡傲不恭尙書張公爲御史時曾按河閒曰韓知縣居官自有家法應行之禮未曾缺少但無奴顏婢膝耳然竟不果取遷鄭州知州發政皆如儀封時公三尹大縣一典名州歸之日諸

朝邑縣志注

卷二

人物三十

三

長春外史

兄弟問俸資若何公曰六十兩諸兄弟未之信也後遭火災諸兄弟於灰中檢得鎔銀如餅權之果止六十兩

王朝雍雷子質程範樊得仁孟填今舉進士朝雍郎中
卷子範縣丞珏子

朝雍字仲和號友山性至孝父奄以言事繫獄雍遍謁諸貴人叩頭求解郟至青腫初授嚴州府推官多所平反作理刑銘嘉靖改元應詔言事諫上勤學禮下節用恤民及革文臣子弟冒濫軍功者行縣不受饋遺自爲市菜和粥人謂之王青菜陞澤州知州庫

人以羨金嘗之立置于法又榜示條約罷不便民者
數事轉懷慶府同知澤人爲立去思碑陞南京戶部
員外郎郎中出爲山西按察司僉事卒于官範字君
儀豪邁不羣初任開封府通判不受饋金丁艱起復
除大名府通判善鉤鉅人稱神明府舊治故天雄鎮
元時圯於河藋爲茂草範督率民兵樵蘇陶甄不煩
公帑而四門堅完屹爲河朔保障河決杜勝相視水
勢自白屋皮口築隄七十餘里水患遂息鄉人爲立
遺愛碑以勁直不容歸子愔以舉人知黔江縣子質
字伯華安仁里人少時穎慧能詩與五泉先生並稱

朝邑縣志注

卷二

人物三十一

三

長春外史

氣吞吐風雲排擊山嶽謂卿相可立致也子六朝璽
字國重母歿廬墓三年朝雍字仲和卽友山子也初
名朝壅丁卯秋試夢甕去底榜出爲今名蓋監臨易
之也授嚴州府推官歷官澤州知州懷慶府同知陞
南京戶部員外郎郎中山西按察司僉事友山子擇
言而發慎行其餘資性英懿才識宏達其治嚴及澤
也法嚴行恕政平訟理上信其賢下懷其惠朝壅字
仲冕丁丑進士三河知縣調鹿邑陞宿州知州未任
卒歲寒顯後彫之資風急見獨搖之操仲冕其人也
朝望字德輝縣學生朝璽字季良乙酉鄉進士獲鹿

朝邑縣志注

卷二

人物三十二

美

長春外史

知縣調永清朝璋國重二子三策生員三獻友山子
六子三省字誠甫癸未進士歷官保定府知府三知
三益三畏俱生員三至三恕仲冕子二三俊生員三
傑德輝子三讓季良子三復朝璋二子三聘三友誠
甫子傳鄉進士登第時年甫弱冠也嗚呼王氏其盛
矣乎自佐翁而下世次刻之碑陰自德輝而上行業
載之誌表茲不詳書云

張我華曰王氏與我兩世諸姻祖姑丈每言泊邨初
有水盈盈如衣帶而城而源頗潔流頗長故王氏累
世簪纓科第蟬聯傳之後又有按察使嗣美布政使

于陞東阿知縣鑰信陽知縣鑠咸居官稱職不忝科名未幾水流漸絕而王氏遂大衰然則堪輿之說信有徵乎伊洛竭而夏亡河竭而商亡三川竭而周室東遷噫天邪人邪

餘未仕卒

中曲里王福魯坡里馬駿平羅里王剛防於里安永親賢里張玘受春里周易望仙里孟熊沙底里東陽靳時熙知縣能子

王河汀 學謨 稱時熙有口辨亦未仕卒

喬誠許清黃秀孟濟張亨張璟秦禮席慶仇約石秀李朝邑縣志注

卷二

人物三十三

三

長春外史

珍薛義李綦馬恭張翼党聰李敬李時楊濬楊寶孟震王臣趙璞馬賢唐通馬充韓威上忠楊銘周瓚王瑾劉紹翟祥暢廣程玨吳珣張輔李聰王純翟景陽王訥馬因呂聰王銳孟奎尙貴馬輅俱歲貢

誠清俱洪武時貢時又有王良健兒邨人十七年貢入大學二十四年刑部問事明年以勤能授山東部試主事又明年欽署本部郎中事主事三十年陞都察院右僉都御史授中順大夫月支俸二十四石爲事三十一年謫刑部郎中戶部尙書郁新薦其行能陞刑部右侍郎授嘉議大夫月支俸三十五石良有

墓在健兒邨附箸于此黃秀永樂時貢時又有吳敏
郭明村人官松江知府墓在郭明故知濟亨璟理慶
約石秀珍俱正統中貢義蒸翼党聰敬俱景泰時貢
翼同州學恭貢未詳何時時濬寶震俱天順時貢臣
璞賢通充威忠銘瓚瑾俱成化時貢時又有孟釗望
仙里人官兗州府檢校紹祥廣珏珣輔李聰純景陽
訥因呂聰銳奎輅俱宏治時貢祥廣景陽俱同州學
輅縣丞恭子時又有王簡安仁里人同州學貢阿彌
州同知教諭昺子貴永康里人正德時白河縣貢貴
宜列輅下

朝邑縣志注 卷二 人物三十四 早 長春外史

喬誠至山西參政一統志云誠處心忠信措事實平

安仁里人墓在親賢里

許清至知州

永康里人交南宣江州今無此州

黃秀孟濟秦禮石秀張翼楊濬王瑾暢廣俱知縣

黃秀長春里人直隸廣平府永年縣濟望仙里人山

西解州芮城縣禮續志作理受春里人直隸正定府

無極縣石秀望仙里人縣關翼太奇里人直隸趙州

高邑縣濬望仙里人河南衛輝府胙城縣瑾沙底里

人以祖任直隸淡州大使因占籍漢中府南鄭縣暢

廣續志作楊廣永康里人四川某縣

張亨王臣俱判官

亨樂豐里人山東德州臣沙底里人清州明天下州
設判官從七品無定員里不及三十而無屬縣裁

張璟楊銘李珍薛義趙璞唐通韓威周瓚俱訓導

璟沙底里人藍縣銘永康里人河南開封府河陰縣
今縣省珍受春里人山西汾州府義喜慶里人河南
開封府鄆陵縣璞長春里人山西太原府興縣通江
田里人山西沁州武鄉縣威懷恩里人山西汾州府
介休縣瓚受春里人河南河南府新安縣楊銘應列
朝邑縣志注

卷二

人物三十五

里

長春外史

薛義之後

馬恭程珏李時上忠劉紹俱縣丞紹知府讓子

恭縣闕珏字兩玉長春里人四川叙州府富順縣下
車捕胡遐逋稅千石又捕治巨盜虎刺寶賂以千金
不色動戴氏子有苟合殺三人金多而獄久不成一
訊而決抵厥辜一縣長服有子範時寺后里人河南
懷慶府河內縣忠知縣志弟山東濟南府德平縣紹
山西蒲州臨晉縣據科貢考又有李秦長春里人河
南彰德府安陽縣丞有王近仁無王訥似是一人名
字互舉溥濟里人同州學貢山東東昌府知事陞河

南彰德府內黃縣丞志皆缺載

党聰李敬俱衛經歷

党聰續志作驄步昌里人江南寧國府敬喜慶里人
江南揚州府聰敬俱府經歷衛疑府字之譌明天下
府設經歷司經歷一人正八品

楊寶州同知

親賢里人河南鄭州明天下州設同知從六品無定
員里不及三十而無屬縣與判官俱裁有屬縣裁同
知

馬賢府照磨

朝邑縣志注

卷二

人物三十六

里

長春外史

安仁里人四川馬湖府今日馬邊廳屬叙州府

馬因州吏目

安仁里人湖廣荊州府夷陵州明志知州其屬吏目
一人從九品

餘不仕卒

長春里席慶永康里仇約西莊里孟震安仁里馬充
安仁里翟祥平羅里吳珣懷恩里張輔高家里李聰
江田里王純安仁里翟景陽溥濟里呂聰續志作吳
聰後改平利縣貢懷恩里王銳望仙里孟奎安仁里
馬輅永康里尙貴

蔚能吏員至光祿寺卿禮部右侍郎能有廉操歷官不營產業卒賜諭祭

明史選舉志選舉三途吏員第三太祖吳元年置宣徽院設院使正三品洪武元年改宣徽院爲光祿寺使爲卿正四品十三年禮部置左右侍郎各一人正三品能受春里人字惟善宣德元年出吏員授光祿寺典簿陞寺丞正統十四年隨駕北征舉總督左掖軍務景泰初以功陞本寺卿賜錦衣金帶以旌其忠天順初進禮部右侍郎歷事五朝廉能謹慎後以忤旨調南京光祿寺卿續藏書況鍾傳後曰能在光祿

朝邑縣志注

卷二

人物三十七

聖

長春外史

三十年未嘗持一禁嚮歸家嘗偕僚聯名疏請查入內供應器皿下禁獄問所由能奮曰上怒不可測能老矣當獨任不以累諸公也獨受責降官論者謂以吏奮身如能與況鍾者殆士人高等何可以資格拘也王河汀學謨曰蔚公起功曹無論致身通顯卽其廉節終始不易而任罪受罰不累同署最稱長厚卽博詩書譚理學者不加於此鄉賢削祀吾不知其何說矣

張我華曰今太平邨王蔚邨縣城馬院皆有蔚氏皆稱能後皆有宗伯祠明德多嗣理固宜然然馬院則

有光祿畫象豐頰龐眉藹藹然厚德君子也帶間懸有牙牌是京師寺卿時所畫先是有王楫者元時人字濟川家秦邨經儒門習法律吏於城興元二路選陝西理問所令史累遷朝列大夫秦州知州踰年乞休以中議大夫同知奉元路總管府致仕翰林編修太子文學曲江張冲志稱天歷兵興關陝大荒楫同汪司徒均布國澤期盡拊救之方灌州洞蠻耗邊贊議招安邊徼寧謐及知秦州民罹饑饉荒政又最他處卒葬秦邨此在蔚公之前志未錄

尉遲閏王式賈訥仇名善俱洪武中以人才徵閏至通判王式賈訥至知府仇名善至知縣

朝邑縣志注

卷二

人物三十八

四

長春外史

明太祖洪武六年罷科舉令有司察舉賢才以德行為本而文藝次之其目曰聰明正直曰賢良方正曰孝弟力田曰儒士曰孝廉曰秀才曰人才曰耆民皆禮送京師不次擢用閏平羅里人福建興化府式受春里人清江府訥永康里人知府未詳名善永康里人直隸保定府安肅縣時又有張九成洪武十五年以人才爲山東新泰知縣上給敕諭信符歷九年考績封承事郎初任會歲侵捐俸賑饑特獎廣愛邑宰周彧洪武中上書求仕進上名與語大說乃授觀察使

或舉劾無所避于是百僚皆畏觀察使俄遷吏科給事中同東宮治秦邸獄歸乃陞通政使以讒下獄藉其家得衣一襲俸米數升上召問曰通政官尊祿厚何大貧邪或叩頭曰臣以草茅待罪九卿自知無功能不稱任使所得俸不敢盡受皆歸之官耳已而通政司乃上或所歸俸金上知其枉赦之因賜錦衣二襲寶鈔若干或沒上歎曰周或難得朕用之不盡其才也

明太祖勅中書省自今有能上書陳言敷宣治道武略出衆者參軍及都督府具以名聞故或上書求仕進觀察使未詳置罷洪武二十四年定吏科給事中

四人正九品通政使司通政使一人正三品苑洛先生周氏世濟清忠傳有通政使或說與志異曰或廉直敢言每有論劾必箸緋衣諸大臣每早皆使人候公長安門外見公緋衣各令取素衣角帶爲待罪具當視朝果有論糾糾者必得罪如此數歲貴近多忌公有譖公貪者上怒公下獄死命藉其家惟米數斗布衣數件召公夫人問曰從或廉無俸金邪夫人曰或自謙不能盡忠故俸稍不入於家寄本司庫中頃之司上或俸金上悟大怒立誅譖公者以金給公家命沿途有司致祭復其官

劉偉田隆王朝璽蘇民望皆親喪廬墓三年偉仕監察御史璽望今納銀爲監生

偉已見王河汀

學謨

曰偉好弈適而翁來色不懌偉

終其身不弈爲御史銜命清戎河南至宜陽聞母病未及上疏遄歸得母子一訣至今言孝必稱劉氏朝璽郎中登長子已見上注隆民望未詳明史選舉志捐貲入國學者曰例監

嗚呼節義人之大閑也豈非人之自立於世者歟吾觀世之達人通士號稱知道翩翩然以自異於世夫其日日稱說仁義不離口其自負豈在婦人女子下哉然竊

朝邑縣志注

卷二

人物四十

巽

長春外史

觀其所以不逮遠矣吾邑有劉烈女者龍門邨人女也成化中父母許婚楊氏楊氏子死女乃素服涕泣不食將臨其夫喪家人咸非笑之有舉人偉者女族兄也女往質焉偉曰汝所爲誠是奈世俗何女曰吾所爲求是而已矣奚以世俗爲然家人竟止女不得往臨其夫喪女乃自縊死嗚呼斯人者蓋所謂建諸天地而不悖質諸鬼神而無疑百世以俟聖人而不惑者也嗚呼烈矣

嘉靖初知縣郃公

相

建劉烈女祠堂三間門房一座

苑洛先生爲之記文與志同不錄祠堂今改爲節孝祠在望獄門內龍門邨在縣北二十里邨西有烈女

墓

節婦則蔚太淑人薛氏

光祿能母

韓太宜人張氏

贈都御史顯妻副使紹宗母五泉先生祖母也成化中旌表苑洛先生韓氏三世貞節傳曰先祖母張太淑人年二十七先祖贈都御史府君卒先君生纔數月祖母性剛嚴先伯父年幾五十怒輒撻之病革已易簣就正寢忽張日呼子曰邦奇幾乎忘却一言我死後無與爾祖父同穴問何故曰我節婦也豈可與朝邑縣志注

卷二

人物四十一

七

長春外史

男子同穴予對曰正爲我祖父守節正當同穴又曰汝仔細商量無致人恥笑也

馬宅妻王氏

宅元初人宅死王氏年十九守節延祐元年旌表

張三妻師氏

明洪武中旌表

王亨妻靳氏

此別一王亨非由義之祖父也成化中旌表

韓迪妻楊氏楊質妻張氏韓繼宗妻雷氏

迪妻楊質妻張俱未詳苑洛先生韓氏三世貞節傳

有雷氏年二十五夫韓繼宗卒遭繼姑之虐怒輒以
簪刺其股肱流血淋漓又遭惡叔凌害百端竹罄南
山晝理生事夜則閉門慟哭徹夜有司上其事聖旨
旌表其門坊價已領時值饑饉食費之坊牌至今未
建雷氏大名府同知爵之妹也爵清修苦節老而彌
篤可謂難兄難妹矣

雜記第七

漢莊熊羆言臨晉民願穿洛以溉重泉以東萬餘頃使鹵地誠得水可令晦收十石于是發卒萬餘人穿渠引洛水至商顏下

使史記作故晦下無收字發上有爲字引上有自徵二字重泉故城在大荔西北蒲城東南各相去四十五里鹵鳥鹵今日鹹地臨晉洛注見上商顏見漢書溝洫志卽鐵鎌山韓昌黎次鄧州界詩有商顏暮雪逢人少之句此自商鄧閒地顧嗣琛誤引此條以解商顏不審甚矣史記至商顏下下又云岸善崩乃鑿

朝邑縣志注

卷二

雜記一

巽

長春外史

井澗者四十餘丈往往爲井井下相通行水水類以絕商顏東至山領十餘里間井渠之生自此始穿渠得龍骨故名曰龍首渠渠址今未詳所在

唐太宗貞觀四年駕幸鹽池經朝邑賜朝邑民今年田租

太宗在位二十三年貞觀一元幸鹽池者一十二年二月丁卯觀鹽池庚午如蒲州甲戌如長春宮免朝邑今歲租賦降囚罪乙亥獵于河濱四年未詳鹽池昔日路邨今日運城在山西解州東西四十里南北十五里有都轉鹽運司

國朝正德庚午朝邑民周雄言朝邑縣東北故有鹹灘萬餘畝近年河水淤漫頗堪耕種當同常田徵稅巡按御史王廷相議曰朝邑鹹田雖暫堪耕種難保將來若便同常田徵稅將貽禍無窮乃不徵今鹹田果不可耕如御史議云

庚午正德五年也鹹灘注見上王廷相字子衡儀封人宏治中進士選庶吉士授兵科給事中正德初劉瑾中以罪謫亳州判官量移高純知縣召爲御史己出按陝西裁抑鎮守中官廖堂被誣逮繫謫贛榆丞屢遷四川僉事山東副使皆提督學校嘉靖二年遷

朝邑縣志注

卷二

雜記二

辛

長春外史

山東右布政使以右副都御史巡撫四川尋召理院事歷兵部左右侍郎遷南京兵部尙書參贊機務入爲左都御史奏解魏國公徐鵬舉兵柄加兵部尙書兼前官提督團營加太子少保從幸承天還加太子太保雷震奉先殿廷相言人事修而後天道順大臣法而後小臣廉今廉隅不立賄賂盛行先朝猶暮夜之私而今則白日之攫臣職憲紀不能絕其弊乞先罷斥用以刺尙書嚴嵩張瓚輩後斥爲民卒隆慶初復官贈少保諡肅敏

正德戊寅朝邑民張某言朝邑太陽諸里民田圯于河

幾萬餘畝乞議處田稅巡撫都御史鄭公移縣視狀知縣陵川王君請曰誠如民某言所圯田稅宜從輕領都御史可其議于是田以糧拆布者凡若干畝

戊寅正德十三年太陽里屬長春鄉有二陽社東西陽邨俱沒於河鄭公名陽直隸安肅人王君名道詳見後

關中南有肴函之固

自函谷關以西總名關中肴山名字或作殺峭又名嶽崆有二陵在河南陝州東東峭長阪數里峻阜絕澗車不得方軌西峭全是石阪十二里險不異東峭

朝邑縣志注

卷二

雜記三

至

長春外史

也函函谷關也秦函谷關在河南靈寶縣西二里西至潼關二百里程大昌曰路在谷中深險如函故名東西四十里絕岸壁立實爲天險漢函谷關在河南新安縣東一里武帝時楊僕所築然肴函俱在關中之東戰國策蘇秦亦曰東有殽函之固曰南未詳北有蕭榆之塞

蕭關名在平涼府鎮源縣西北一百四十里榆卽史記衛青傳所謂榆谿舊塞也明置榆林衛有長樂堡分轄雙山等十二營堡爲中路有神木堡分轄鎮羌等九營堡爲東路西有安邊營分轄永濟等十二營

堡爲西路北有遺牆成化九年築長一千七百七十餘里東起清水營接山西偏頭關界西抵定邊營接寧夏花馬池界今榆林延安二府地

西阻棧道

棧道閣道亦曰連雲棧在褒城縣東北崔浩曰險絕之處傍鑿山巖而施板梁爲閣

東據黃河

自榆林府葭州綏德州延安府同州府至潼關皆東倚河

古稱四塞之地故曰秦得百二焉

朝邑縣志注

卷二

雜記四

五

長春外史

四塞東函谷南武關西散關北蕭關也史記或說項王曰關中阻山河四塞漢書作阻山帶河四塞之地史記田官曰秦形勝之國帶山河之險縣隔千里持戟百萬秦得百二焉蘇林謂二萬人足當諸侯百萬人虞喜謂百萬當二百萬程大昌從虞說然河自夏陽而北兩岸山領陵複不可以師兩岸山岡磅礴數千里林麓蒼黝豁澗鏤錯其水尙崩浪萬尋縣流千丈渾洪轟怒鼓若山騰濬波顏疊迄於下口方知慎子下龍門流浮竹非駟馬之追也酈道元說夏陽而南經朝邑至潼關凡百里率平曠易渡

東西原隰相距數十里百里不齊皆漫衍無高岸也故漢祖往來關中嘗由臨晉而七國謀反亦欲由臨晉入兵

漢二年三月漢王從臨晉渡七國吳膠西膠東菑川濟南楚趙也吳王濞反使遺諸侯書有云齊諸王與趙王定河間河內或入臨晉關或與寡人會雒陽是朝邑者關中之隙道也故一方不戒三險俱失矣三險有函蕭榆棧道也

正德己卯知縣陵川王君言朝邑爲山陝要衝與蒲華等然朝邑獨無驛所又近時河南應驛者率避潼關而朝邑縣志注

卷二 雜記五 三

長春外史

之朝邑遂爲三省之滙朝邑民不任供送于是巡撫都御史鄭公下其事乃以郃陽馬騾二十夫百人澄城馬騾十有五夫八十人協濟朝邑

己卯正德十四年也縣舊有朝邑驛故趙抃記謂新市路當秦晉要衝自唐宋以來名臣賢士經由往返莫不稅駕投榻于此不知何時驛廢而民乃不任供送之役矣陵川王君後萬歷中又停郃陽澄城協濟夫馬至今雖無旌節往來而赭衣流遣之徒新疆謫戍之輩率以春秋二時由永濟河東驛徑大慶關以達華陰潼津驛夫馬供給不勝其苦甚則脫輿夫之

駕解犁轅之駒停征人之轡者有矣關差之外重有
是累安得如陵川王君者又一言之也

朝邑縣志後序

右朝邑志七篇工部員外五泉韓汝慶之所編也紀錄質實而文彩煥炳可誦其傳人物說高翔程濟及烈女劉氏事婉乎若覩其人真足以廉頑而立懦不可謂無筆力也而雜記一篇又多政事利害所關以示後之爲朝邑者何惑焉其餘五篇事雖不異他志而紀例亦自殊稱爲簡確之編信矣然則陵川王君純甫知是邑而刻此編人雖曰不良于政則吾不信也正德己卯秋七月廿二日賜進士及第翰林院修撰儒林郎同修國史經筵講官高陵呂柟書

朝邑縣志注

後序一

一 長春外史

柟字仲木高陵人居涇水之陽學者稱涇野先生未總卅卽志聖賢之學危坐朗誦小屋中祁寒酷暑不踰戶限正德三年中會試第六人廷試擢第一爲翰林修撰逆瑾擅權柟雖同鄉獨不往且却其賀瑾不堪又因西夏事疏請帝入宮親政事潛消禍本瑾怒欲殺之引疾去歸杜門力田養親若將終身焉瑾誅以薦復官上勤學疏謂文王緝熙敬止咸和萬民斯享臺沼之樂元順帝廢學從欲太祖一舉而取之可爲深戒乾清宮灾應詔陳六事其遣去義子番僧取回鎮守太監尤人所不敢言父病歸及其卒也自成

服奠葬遷柩題主及卒哭三虞大小祥禫斟酌損益各有儀注楊東江輩葬父母咸踵其遺意而行之鎮守太監賻以金幣立却之客有托交游以三百金求書者則峻拒之曰人心如青天白日奈何以禽獸相視也世宗立首召枬上疏勸勤聖學以爲新政之助大禮議興與張桂忤以十三事自陳中以大禮未定諂言日進引爲已罪上怒下詔獄謫解州判官攝行州事恤災獨減丁役勸農桑興水利築隄護鹽池行呂氏鄉約及文公家禮求子夏後建司馬溫公祠正首陽夷齊墓察孝弟節義者標題其門四方學者日

朝邑縣志注

後序二

二

長春外史

至御史爲闢解梁書院以居之居三年陞南京宗人府經歷吏部考功司郎中尙寶司卿吳楚閩越士從者百餘人時張相國應詔道出南京有醮禮爲賀者托以官卑祿薄拒之陞南京太常寺少卿太廟災乞罷黜不允在南京六年十四年入爲祭酒躬行以率之以正心修身忠君孝親爲本晉南京禮部右侍郎署吏部事帝將躬祀顯陵累疏勸止不報奉表賀萬壽節值天變遂乞致仕歸卒年六十四是日有雷火日食之變高陵人爲罷市三日解梁及四方學者聞之皆設奠位持心喪訃聞上爲輟朝一日賜祭葬諡

文簡柵受業渭南薛敬之接河東薛瑄之傳學以窮
理實踐爲主官南京與湛若水鄒守益共主講席仕
三十餘年座止圖書室無妾媵終身未嘗有偷語惰
容時天下言學者不歸王陽明則歸湛若水獨守程
朱不變者惟柵與羅欽順云所著有四書因問易說
翼書說要詩說序春秋說志禮問內外篇史約小學
釋寒暑經圖解史館獻納宋四子鈔釋南省奏稿涇
野詩文集

朝邑縣志跋

道始至蒲臨河而西望朝邑卽壯其山河之美比入境左唐關右隋宮盡覽其古跡之勝比入郭閭里輝聯後先掩映則又歎其人物之秀且盛而果非他邑比也顧其邑志繁蕪汗歲不足以彰往而詔來道乃請諸五泉韓先生作此新志焉其去舊志雖省三之二然而爬羅剔抉昭昭乎可激勸于人者不啻加千百也旣而又得對山康先生涇野呂先生序諸前後則斯志也滋可傳諸木以爲斯邑實籍矣若夫企先賢而思齊覩名宦而思政慨風俗而思移易觀利病而思興革則又後之有志者事也于道何有哉皆正德己卯九月吉旦知朝邑縣事山西陵川王道跋

朝邑縣志注

跋一

一
長春外史

道字純甫山西澤州陵川人澤州今陞府陵有六泉故號六泉氏由舉人正德十二年授朝邑知縣至則嚴捕緝故盜賊息明聽斷故詞訟簡清荒稅故貧困蘇崇文獻故典籍具服上禮下故聲稱洽吏部推陞臨洮府通判嘉靖五年轉河南府通判河南多盜設判捕之道知盜故敝令曰里人弗發覺者有常刑受命弗戮力者有常刑以賂故縱者有大刑怙勢藏匿者有大刑以是四境克寧久之棄官歸嘉靖八年卒

年五十四

朝邑縣志注

跋二

二

長春外史

朝邑縣志注自序

朝邑張氏曰鵬翼避紅巾之亂自山西洪洞來奔居縣東長春鄉之東陽邨是爲長春張氏其先蓋出于黃帝子少昊青陽氏第五子揮爲弓正始制弓矢子孫賜姓張氏中葉有仲周宣王時孝友美見于詩後裔事晉世爲大夫有侯老趨幣三卿分晉在趙曰談在魏曰旄曰丑在韓曰去疾曰譴雖俱顯三晉而世系莫可得而考焉烏呼揮仲之後不知何自而有鵬翼公者鵬翼公子孝忠生子翥翥生莢莢生翔翔生夢麟夢麟生騰桂贈中憲大夫湖廣漢陽府知府知府始讀書爲士人嘉靖

朝邑縣志注

自序一

一 長春外史

三十四年地震之變知府攜妻陳太恭人自東陽邨遷于白冢再徙潼關卒遂葬焉有子綸音中萬歷二十九
年張以誠榜進士歷官南京戶部郎中出爲湖廣漢陽
府知府尋遷按察司副使屯鹽道致仕歸白冢人稱白
冢張氏天啓二年卒卒二十二年而有甲申之變提學
乃遷居縣南門人又稱南門張氏提學諱好奇字平子
號知天副使中子也順治五年舉于鄉九年登鄒忠倚
榜進士起家河南鞏縣知縣鞏人立生祠歲祀之入爲
戶部主事陞員外郎遷刑部郎中康熙十一年主考福
建明年轉河南按察司僉事提督學政敬歷中外廿餘

年及卒家無餘貲享壽七十有八歲葬小伏坡與副使同隴又與副使同祀鄉賢祠提學二子長贈文林郎山東觀城縣知縣述祖次儒學訓導續祖訓導生生員毓琮璧九璧九生鄉知縣生生員毓珣珣獻東獻東生生員大錦成九是爲浪園先生初璧九子鄉殤以浪園先生爲子旣璧九室李曰獻東之世不可絕也別爲浪園先生娶於江都李氏生元觀實我華遂以爲璧九後其生也浪園先生以周易筮之遇觀三三之漸三三曰是謂觀我生進退此其識通塞之義乎善用觀也命之曰元觀歎曰能以正進可以正邦也觀已之所行進退不失

之推遺迹閭郭有道碑文道平陽渡河於蒲旣而訪友
長安賣嵯興平謁茂陵往來馬嵬扶風詢班馬遺文董
生下帷之處如是者數年五十五年乃築室縣西關秦
安堡古之長春宮也奉母北堂閉門守拙蓋將有終焉
之志矣如是者又數年五十九年有事于河北知藁城
整庠路命卿延致幕館非其好也嘉慶改元歸自正定
夏五酷暑獨坐一室讀五泉先生朝邑志而嘆曰斯志
也簡覈爾雅利病俱陳可以範世可以惠民雖古良史
何以加焉王漁洋與康對山武功志並稱之洵文章之
宏麗者也獨是先生以命世之才操良史之筆辯而不

朝邑縣志注

自序三

三

長春外史

華質而不俚古雅沖淡非注莫明武功志孫酉峰太史
箋評板行矣斯志也可無傳乎於是不辭固陋詳加校
正兼采經史百家先儒之說及續後二志集而注之惟
拓其義不具書名其或文有隱約則詳引衆說闕其所
疑時見微意有所裨補務在翼贊志文不作矛盾仍用
漢人經解之例志注別行庶五泉先生妙才快筆不爲
注文隔斷耳所媿妄言末學蕪蕪舊章古人譬之疇星
之繼朝陽良用忸怩計兩閱月脫藁凡三萬四千六百
六十九言藏諸篋笥時自披閱若好古博雅君子與我
同志亦無隱焉嘉慶元年歲在丙辰秋七月甲辰朔旦

長春外史張我華元觀父書於瑞石山房


朝邑縣志注

自序四

四

長春外史





韓文宗詩集

韓安人詩附

地 153.43

27+

地 170.155
274.1
14
27+



韓安人鑽詩附

張元觀瑞石校

韓文公集

嘉慶元年開雕

是政堂藏板

韓五泉詩集附錄

諸家評語

渭南劉鳳池曰皇朝之興方值隆運諸作者殆累累可數而關中士尤爲奇峭軒卓狀皆積學歷年始克成家固未有五泉子之穎達夙成最後出而先鳴驚世者也豈所謂鵬運龍飛本于天性無事習學而自能者耶

又曰五泉子孝友敦穆始終無間至於守官之節抑又屹狀岌狀九死不回迄今誦其詩識其溫厚嚴潔備四時之氣語云詩可以觀其信狀矣

韓五泉詩集

附錄

一 是政堂藏書

武功康對山曰予因韓子汝慶之歿于是傷天地之德有所不能自盡焉謂天祐人國家卑之以才矣復爾斂之扶輿之氣萃之有期期不常逮逮矣復斂天道柰何聞汝節彙汝慶詩若干卷藏之家笥此可以表見來世讀其詩思其人滂其志於戲汝慶可弗死矣

嘉靖丁酉春三月七日

鄆杜王漢陂曰予在京師見五泉子七言絕句詩類杜子美及罷歸爲子訟其古歌詞漫淫唐初逼漢魏矣觀朝邑志其文章之鴻麗者乎夷考其行蓋曠世之英全德之士也



朝阪李河濱曰五泉與北地諸君子光稱昭代今誦
其諸什隱含風諫顯垂規箴忠愛誠至和平渾穆如
元明宮長安宮女甘州感事出軍西巡皆以詩史其
寄兄動忠孝之思送人寄規勉之意聳讀者聽起聞
者色餘所吟地詠時吐吞今古旨趣淡遠紀律清嚴
是雖賸技讀其文猶可想見其爲人 崇正元年中秋
朝阪樊恕夫曰五泉穎悟絕人其爲文高古雄放可
追先秦兩漢其詩初效子美又更爲初唐上匹漢魏
矣

韓五泉詩集

附錄

二 是政堂藏書

韓五泉詩集目錄

卷一

古歌行十一首

臨高臺

弄玉篇

渡河篇

公無渡河

採蓮曲

長安有狹邪行

元明宮行

韓五泉詩集

目錄一

一 是政堂藏書

寄漢陂王先生兼呈對山康先生

南山有虎北山有鳥行寄對山康先生

長安宮女行

甘州行

五言古十一首

寄涇野呂先生

寄苑洛兄

曉眺

長春亭

沙苑

臨河篇送涇野呂先生

涇野古詩一首

晚坐古詩三首

寄戴遂谷

卷二

五言律三十九首

中秋同何大復望月二首

送蔡給事入閩席上分韻二首

病中送人入陝

憶馬百愚

韓五泉詩集

目錄二

二 是政堂藏書

聖節

紅菊同何大復席上分韻

送謝屯部之湖廣二首

飲興隆寺分韻

送馬敬湖先生

送陶行人良鄉

送二兄赴平陽席上同何仲默孟望之劉子靜

分韻

聞鴈

雲中九月八日同張年兄字川登高

憶馬侍御

送周世寧還

關中二首

寄苑洛兄

席上分韻送馬百愚

席上聞歌分韻

獄中絲帳

南張寺

正月十四日飲宗人宅時自使山西歸省

寄楊侍御師文年兄

韓五泉詩集

目錄三

三

是政堂藏書

破賊

嘉禾爲劉貫道大尹賦

苑洛兄以言語得罪孟無涯夜話

寄舍弟

河中書院

送九川呂先生參政山東

手種

辛巳除夕

馬嵬

寄呂九川年兄

暮春

思棠爲馬太守

五言排律四首

鎮江平賊二十韻

送林都憲巡撫圻內

移月堂爲馬敬湖先生作

寄呂九川年兄

五言絕句三首

席上贈歌者

獄中寄友二首

韓五泉詩集

目錄四

四 是政堂藏書

七言律二十六首

葉家樓 武皇北巡曾此駐蹕

送張駕部參佐大中丞彭公討蜀駕部山東討

賊功成復有是命

送馬公濟參佐大中丞彭公討蜀

送周世寧還二首

兩

弈碁二首

憶孟望之二首

秋日

春暮

陳真人院牡丹同何仲默孟望之分韻

東雷伯華進士

冬日

聞李空同過浙喜而有作

華山二首

感事二首 正德丁卯

清溪居士爲曹侍御祖賦

雪晴

北上二首

韓五泉詩集

目錄五

五 是政堂藏書

秋雨

冬夜

七言絕句六十九首

谷太監出軍歌三首

聖上西巡歌十四首

庚午春使湘舟行得權歌六首

杭州吟東段夢瀑年兄六首

閨辭二首

楚宮

漫成四首

解悶五首

二月二十五日雨四首

送馬敬湖先生三首

寫軸二首

飲酒

王鴻臚挽詞二首

小圃卽成池亭可待口號四首

經石國公墓見新開河

解悶八首東何大復孟無涯

春興二首

韓五泉詩集

目錄六

六 是政堂藏書

煖水何

韓五泉詩集卷一

明五泉山人朝阪韓邦靖汝慶父箸

清長春外史後學張我華元觀父校

古歌行

臨高臺

東隣鬪雞罷南山射虎回且空繫驄馬復此臨高臺
複道千尋直長安九市開香室街前流紫霧青城門
外翳紅埃紫霧紅埃碧玉堂可憐朱戶映垂楊袁氏
池塘桃作鴨田家甲第杏爲梁鐘聞隱約天鷄動香
引盤旋海鶴翔城中寸金作寸土高臺千尺還千堵

韓五泉詩集

卷一

一 是政堂藏書

紋石行行龜背裁瓊瑤歷歷魚鱗數千重階級玉麟
排十二闌千金鳳舞丹碧遙從海外至峇巽那向人
閒覩萬戶紛紛在眼中雙闕巍巍插兩峰煙迷宮樹
綠風落御溝紅遊子春何劇佳人晚更逢霓裳晴雜
雨鶯帶曉疑虹來往春風開翠幃宛轉秋波上玉驄
此時京國信繁華此日侯門氣轉奢公子遙擎百寶
蓋王孫更引七香車雙雙丹轂長楊柳兩兩金銜上
苑花谷中引隊雲錦亂門上爭馳意氣加青蓮風轉
金吾漏翠燭煙分貴戚家人閒不信清波逝自謂能
揮白日斜白日西山已半沈開簾更宴妓如雲金盤

膾玉鮮鱗出霞帳連雲彩翼分楚舞秦聲迴趙瑟吳
姬越女翦湘裙似玉容何絕如蘭氣更芬幾回曾向
月中見一曲還應天上聞天上人間不可知五陵豪
邁正當時還看葉落終辭樹那得花開常在枝萬事
傷心在眼前一朝滿目生秋煙若拋白日看歌舞且
貯黃金禮俊賢

弄玉篇

南天鵬海飛難盡北極鰲峰鎮不搖元圃三山金作
殿青谿百仞玉爲橋千春翠樹元霜落九夏洪厓紫
雪飄桃花歷亂常迷路彩鳳翩翩翻不易招十年不得

韓五泉詩集

卷一

二

是政堂藏書

青鸞信一旦還吹碧玉簫窻前度曲通眞訣竈下修
丹悟浪燒飄飄翠袖空中舉白日于飛作仙侶騎鶴
雙雙闋苑來乘蚪兩雨天台去緱山初月似梳明洛
水清波雜佩聲雲車並駕朝王母霞帳聯絲伴許瓊
人間滄海塵將滿天上朱桃果未成弱水圓洲三萬
里方壺絕頂九千坪飛去飛來煙霧裏爲雨爲雲朝
暮行翡翠蘭苕不獨棲玉盃金案學齊眉豈知寶殿
嫦娥怨翻笑銀河織女思同是神仙不同樂掩泪年
年傷寂寞玉指終朝虛度機金圭往歲空餐藥不如
且斫瀟湘竹相隨共奏鸞凰樂

渡河篇

河之水河湯湯河之濟不可忘岸有蒲兮洲有葦昨日渡兮今日歸同舟之人知我者稀

公無渡河

狂夫渡河死其妻乃哀之傍人感此事箜篌寫其辭哀響亦何切千載有餘悲敬爾百君子冥行安可追

採蓮曲

江南七月蓮花開江上女兒採蓮來桃頰雙垂映秋水菱歌一曲望春臺春臺一望隔千山征客秦關更楚關妾意如舟元不定郎行似水何時還若耶溪雲

韓五泉詩集

卷一

三

是政堂藏書

門島江水何茫茫江風何浩浩暮雨朝雲江上樓春蘭秋蕙江邊草遠樹千重屬目頻歸帆一片憂心憐一片歸帆望不來誰家簫鼓畫船開還看舵底鴛鴦宿又見艫頭鴻鴈回一溪還一曲採蓮採未足水清石磊磊採蓮意已息越女長歌不宥休吳姬輟櫂猶相待去年儂採蓮今年蓮復採年年江上花朵鮮歲花中苦心在中有苦心君不知請君但看並頭枝可憐片片同心蘂但作悠悠滿內絲官道採桑勞妾身西湖採蓮傷妾神雲窻織罷愁長日煙嶼歌殘望遠人遠人不可見且唱採蓮歌桂檝蘭橈下極浦青

樓朱簿此山阿芙蓉苑外金鞍度楊柳堤邊玉騎過
紅塵駐馬非無意白露沾裳將奈何將奈何採蓮歸
明月前溪一鏡飛珠翠綺羅紛照耀吳謳越吹相因
依明年倘若蓮花發蕩子關山莫更違

長安有狹邪行

妾年十六君十七妾車君馬一時出長安大道多狹
邪錦鞵繡幕隔咫尺妾意濃如雲君馬疾如電妾心
君不知妾貌君當見惠和之聖千古師女子坐懷焉
足辭何物魯男子徒爲千古任達嗤妾家高樓入雲
中珠簾玉簿城之東回君青驄馬持妾碧玉鍾君歌
楚歌妾楚舞君爲趙瑟妾秦缶勸君酒君莫辭莫以
心如鐵令他鬢若絲君不見桃花開時杏花落人生
代謝各有時今日相逢不相樂明日相逢安可知

元明宮行

長安送客城東道柳葉楊花春正早元明宮前下馬
時一片煙花長萋草宮中道士邀我入素果清茶日
未昃白河東下禁城西指點湖山三嘆息正德三年
與四年劉瑾專權斧屐前可憐帝主推心腹縱有邱
張豈比肩帷幄空多戚里恩論思無復侍臣尊千官
盡走東河下庶政全歸左順門震主傾朝不自知回

天轉日更誰疑金貂滿座銜恩日朱戟升堂頌德時
翻嫌仇李光榮薄却笑曹侯意氣卑謀生意拙還謀
死更起元明作蒿里甲第侯王已莫論陰山將士那
堪比土石西山半欲摧棟梁南國萬牛回虛閣平臨
金闕杪假山下指鳳城隈琪花瑤草尋嘗得萬戶千
門次第開千門萬戶何逶迤玉鼎瓊几更絕奇金人
兩兩坐相向錦石亭亭立不危崇垣豈止行千堵佳
樹俄看大十圍元明之宮高莫匹四海京師俱第一
金盃常思埋甲盾銅駝不解生荆棘自古威權不到
頭九重一怒罪人收幾年烈焰俱灰滅一旦冰山作
韓五泉詩集

卷一

五

是政堂藏書

水流冰山烈焰事俱非座上門前客盡稀須臾蔓草
縈枯骨宛轉佳城屬羽衣門掩官河十里長山藏隴
樹一千行今古誰存三尺土姦雄空作百年忙春風
有客時雙入寒食何人奠一觴低雲拂翠迷寒柳愁
雨沾花落晚香卧牛不得歸岡勢怨鶴空聞繞夕陽
夕陽漠漠鶴歸遲却憶元明全盛時千人舉杵萬人
和九仞爲臺十仞池雨露霜靈歸喜怒曾青丹碧豈
珍奇萬民累足臣屏息四海離心主不知從來偏重
多憂患自古末流難障捍周朝封建奠侯邦會見羣
雄歸桀悍西京宰相多戚臣終遣諸王構危難東京

政事三公缺閣宦專權禍尤烈我今遠過唐代上茲
謀無乃東京轍正統王振擅權時先朝李廣亦恣睢
只今不獨劉瑾盛帝主旁前安可知倚社難薰古如
此操刀必割誰能已三穴那能窮帝旁萬機況復歸
司禮救枉扶偏本不同更張琴瑟始成功還期聖主
思前事莫遣元明有別宮一興一敗一登臨千樹千
花笑古今崢嶸乍可誇豪傑轉眼繁華日易沈

寄漢陂王先生兼呈對山康先生

君不見孝廟求賢十八春晚年更與儒臣親漢陂夫
子玉堂裏文雅風流無比倫一朝却酒秦陵泪世間
韓五泉詩集

卷一

六

是政堂藏書

萬事徒悲辛少小唐堯思致主白首曾參翻殺人可
惜英雄老巖穴坐令將相困風塵我昔封書謁紫宸
隔歲東曹未致身嘶鳴伏櫪本凡馬顧盼升堂殊衆
賓君向南州苦盜賊使我雙鬢今如銀途危幸得免
豺虎時平何不爲鳳麟眼前反復尙如此疇昔驅馳
安可陳對山亦卧渭水濱先帝詞臣何太頻十年俱
染青蠅譖九重應念蒼生貧何日酬知兼爲國宣室
還教訪逐臣

南山有虎北山有鳥行寄對山康先生

南山有虎不避賢君乃以手摩其顛北山有鳥文彩

鮮君之毛羽何翩翩昔人曾忌直如弦況有高才朝
士前時若憐才更容直請子橫飛上九天

長安宮女行

長安城頭夜二鼓道士敲門稱太府爲道君王巡幸
勞選取嬌娥看歌舞應酬未得話從容塔除早已人
三五倉皇便欲將我行那官相留到天曙平昔嬌癡
在母傍黃昏不敢出前房如今却向何處去似墮淵
海身茫茫四更未絕五更連父母相隨太府前頃刻
回頭同伴至亦有耶娘各慘然雖同閭里不曾親那
得相逢及此辰清泪俱含未妝面愁魂不附欲傾身

韓五泉詩集

卷一

七

是政堂藏書

天明却轉雙輪疾送我城東坐官室生來雖在咸寧
城目中誰識京兆驛已看閨閣隔重天乍度昏朝似
千日中有數人不甚愁問之乃是勾欄流平生謔浪
輕去住却說能觀五鳳樓望承恩寵心雖別思到家
鄉泪亦流纔言欲去去何忙翠幕油車已道傍小小
生離還死別傍人見我空徬徨嬌憐姊妹不得訣父
母送我澆水陽相看痛哭各捨去此時欲斷那有腸
城裏家家錦繡簾我輩姿容豈獨妍東家有女如花
萼且入黃金名已落西家有女如玉瑩夜翦烏雲晨
不行我輩無錢兄弟劣坐使芳年成訣別渡河渡渭

還渡汾千山歷盡雪紛紛江流山館猿常哭葉落郵
亭鴈屢聞自從墮地誰窺戶此際無家却望雲迢迢
千里還歲窮大同才得到行宮常言朝見何曾見淡
院蕭蕭盡日封當今天子說神武時向三邊乘六龍
來臨瀚海神偏爽思滅稽胡志獨雄近時雙驛駐榆
塞不知何日來雲中消息常傳不是真寂寥看已到
初春冰霜豈似心中事雲物空驚塞外新轉眼還成
正月末忽然大駕還沙漠見說天壇禮未修還兼太
廟春當禱京師暫欲駐鸞旗屬車還載蛾眉歸却向
豹房三四月欲近龍顏真是稀宮中景色誰曾見宮
韓五泉詩集

卷一

八 是政堂藏書

外楊花徒撲面有眼但識鴛鴦瓦有身那到麒麟殿
鳳舟時泛西海渚採蓮不喚如花女鸞駕常操內教
場何曾湯火試紅妝有時鬪虎獸圈臨當熊徒抱昔
人心茶飯每排新寺裏不用明眸兼皓齒空有娼家
色藝高隨人望幸亦徒勞宮花枉自羞妝面御柳何
人鬪舞腰君王不御人轉賤盡日誰來問淡院日給
行糧米半升大官空有珍羞饌有時飢餓難出戶君
王豈愛細腰舞還將顏色博貧難萬折誰知心內苦
豈能種竹邀羊駕何得栽花教蝶聚金屋年來是浪
傳花錢月給誰曾覩旁人見我入天闈謂我將承帝

主恩豈知流落還愁恨榮寵何曾但泪痕妾家雖貧
未甚貧絲麻布帛亦遮身有時亦繡鴛鴦枕翠線金
針度一春一春鸞鏡不停妝機杼言忙苦不忙寒食
清明邀等伴銀釵羅髻亦風光父母如同掌上珠兄
弟看成亦不殊少小媒來未輕與去年才許城東夫
乘龍跨鳳雖未必竝宿雙棲亦不孤百年光景誰曾
見一但榮華土不如榮華光景猶閑可兄弟耶娘怎
柰渠當時同輩聞我說珠泪人人落雙頰亦有因緣
與恩愛誰無父母同家業可憐拋却入君門九夏三
秋那可言風雨苑淡同白晝星河樓淺共黃昏我曹

韓五泉詩集

卷一

九 是政堂藏書

豈是無傾國聞道君王還遠色宮禁幽淡誰不知踪
迹民間頗堪測漢家多欲稱武皇元宗好色聞李唐
衛氏門前誇揖客楊釗海內無三郎主上今來十四
年劉瑾朱寧聞擅權往時勢焰東廠盛近日威名遊
擊偏邱張谷馬紛紛出那有皇親得向前又聞親受
于承戒大輩不御思長年更寵番僧取活佛似欲清
淨超西天君王賤色分明樂那用當時詔旨傳當時
陝西有廖大此事恐是茲人專滔天罪惡思固寵逢
迎却乃進嬋娟去年氈帳云欽取狗馬年來俱奉旨
何曾竟有君王詔此曹播弄常如此國家近日重錢

財金門紫闥非難開黃金此輩如山積縱橫豈顧傍
人猜當時黃紙誰曾見昏宵況復如雷電勢成威劫
非一朝可憐爲國多招怨自從陝西有斯人灾禍年
來何太頻閭里已教徒赤壁閨闈還遣閉青春青春
零落不須論別有淒涼難具陳同來女伴元不少一
半已爲泉下塵妾身雖在那常在溝渠會見骨如銀
愁心化石定不朽怨魂入地應無垠我聞貴人皆英
賢左諫右輔何翩翩近時叩闕諫南巡何不上書放
宮人上書雖是履危機萬一妾身得生歸

甘州行

韓五泉詩集

卷一

十

是政堂藏書

去年採木劉侍郎萬里橫尸柳水旁今年甘肅許巡
撫麾下縱橫身已亡我朝禦狄重邊徼紀綱號令稱
三堂胡爲一朝灾變起三軍却殺都御史明日事定
獄已成四人作禍先已死懸首城頭正王法可惜不
得知名氏往歲才公總制時塞上將軍同出師日暮
營中俱奏凱尚書城下獨輿尸廟堂至今不宥究白
面書生空嘆咨我聞許公初下車法令慘刻機謀疎
鎮守參隨頗筮楚將官頭目皆趨趨統禦當時信失
策波流他日將何如部侍郎都御史汝死不足惜可
惜明明天子紀君不見唐時逐帥成末造覆轍千年

在青史

五言古

寄涇野呂先生

晨風北林發明星東屋稀攬衣步階除念子行忘歸
譬彼同筵人食苦嘗共藿憂心不得照昔爲澗邊葵
拔茅進賢士采葑下體偕豈不懷斗祿將以舖匱糜
無才濟時艱素餐君子譏潛藏豈素心引蹈非知機
君懷抱良璧何乃迷邦畿駕車策君馬遲遲當寧饑
時平爲良臣時危忠義施鷓鴣顧斥鷃安能同奮飛
鳳皇與黃鵠翱翔有時違唐虞信易致臯夔安可非

韓五泉詩集

卷一

十一

是政堂藏書

寄苑洛兄

雪雲劇歲暮熙風扇初春獨傾一盃酒念此千里人
千里遠行役是我同胞親同胞爲兄弟憂懼難具陳
食藜不獨苦含藿嘗共辛皇天昔降虐嚴霜摧庭椿
懷生豈我志滅性還爾真形軀苟視息行坐忘心神
時哉更食祿何以報蒼旻我欲竟此曲心摧肝已分
但墮居者泪忍令遊子聞萱堂來福履歲月幸茲晨
勉爾忠孝思慎爾父母身

曉眺

撫景眺高原浮雲東北馳下有娟娟人迢迢我心思

冥冥隨春鳥翩翩向我飛引領顧此鳥因之欲寄辭
此鳥豈無情羽翼何摧頽林深道路遠網羅常苦隨
微軀豈足惜何以達君懷

長春亭

朱雲依峻宇丹亭倚危岑大華阻前眺長河來左襟
紛芳鬱南苑繁翠交中林楊隋正全盛文皇何荒淫
彩鸞華棟落仙仗錦宮臨賞心期晏暮佳名耀昔今
物里更變化歲序互升沈安得四時好遊覽悅君心
晉陽旣乘勝唐兵亦何淡幢麾偈此室羆虎多如林
傷哉王氣盡榛莽相追尋

韓五泉詩集

卷一

七

是政堂藏書

沙苑

青青沙苑柳枝葉何繽紛鬱鬱佳人思行行壯士勲
日暮鴻鴈來牛羊亦成羣宿食潤邊草飛鳴洲渚雲
懷人不可見往事空爾聞

臨河篇送涇野呂先生

龍門昔旣鑿河流若奔雷逝波東到海千年不復回
汎汎中流木歲歲從何來旁人不之覺懷望乃仙才
琴衣坐汎濫裹糧泝渦洄不知滄海窮但見星辰開
引領望前途樓觀何崔嵬白露侵衣裳黃金爲殿臺
玉兔殊凡獸銀榆殊塵栽中有綽約人縹緲雙玉腮

凝神秋水澄被服朝霞指纖纖素手出亭亭金梭借
龍紋何縱橫鸞鳳相裴回玉齒不煩啟靈境難易猜
粲然饋拳石恍已墮埏埉君平旣棄世高談物理該
持之再三嘆彼其峰麓材乃知手中物織女機下瓊
仙宮在天上何以升其階茲事今不泯遠遊昔所諧
春波正浩蕩君行涉其涯俯擊舟中楫仰看雲漢回
君本瀛洲人仙子非難媒爛漫機中錦慙慙或有裁
黼黻此下國補袞我所懷邈矣作空人一石何有哉

涇野古詩一首

我過華陰縣君渡渭河來相逢楊花鋪相看夢中猜

韓五泉詩集

卷一

三

是政堂藏書

依依底岳廟復此覘酒盃廟自開闢有岳自乾坤開
中有千丈栢問植萬年槐榦與雲霄薄根爲黃河栽
日暮携手遊盤旋上方臺高覽神林樹皆是茲山材
茲材柱廟廊不令天地頽

晚坐古詩三首

名山羅夕日高原藹秋陰西風自何來吹我芳樹林
寒蟬發哀調蟋蟀嗣其音歲時日以暮霜露日以深
相思不自遣無乃勞君心持君一盃酒此物開鬱沈
寒林停落照烟光何霏微起坐看鳴鴈一一皆南飛
鴈飛不可極君心不可識西風蕭然來江波動秋色

明星旣燦爛白雲亦悠揚明月入我戶西風吹我牀
牀頭舊時衣美人手所將美人豈不美乃在天之涯
十書九不達何用空嗟咨

寄戴遠谷

蕭蕭山之雲瀾瀾江之水雲豈不飛揚水亦或流止
吾懷吾遠谷切切不能已晤言昔不疎各各懷鄉里
扁舟東南來歲月焉足紀渭濱有餘田願言從茲始

